

LE OLOMATAMATA

FAASILASILAINA LE MALO O IEOVA



MATAUPU MO SU'ESU'EGA MAI IÄ:
TESEMA 25, 2017-IANUARI 28, 2018





ATA PITO I LUMA: NICARAGUA

O loo faailoa atu e ni tuafāfine Kerisiano se to’alua le fe’au mai i le Tusi Paia, i se fafine faatauolua i le taulaga o Tipitapa

‘AUTALA’I
28,642

SU’ESU’EGA FAALE-TUSI PAIA
42,298

Ē NA AUAI I LE FAAMANATUGA
(2016)
88,308

LISI O MATAUPU

3 VAIASO O TESEMA 25-31 Ia Pepese Atu ma le Fiafia!

Ua leva ona avea pese ma vaega tāua o le tapua’iga a tagata o leova. Peita’i, o nisi atonu e faatalatū e pepese a o iai faatasi ma isi tagata. E faapefea ona tatou manumalo i le popole e faaogā o tatou leo ina ia fai pesega ai iā leova? O loo faamatala i lenei mataupu māfuaaga lelei e ao ai ona tatou pepese leotetele ma le fiafia, ma nisi o fautuaga ina ia faaleleia ai o tatou leo.

8 VAIASO O IANUARI 1-7 Po o E Sulufa’i Atu iā leova?

13 VAIASO O IANUARI 8-14 Ia Faa’oa’o i le Faamasinotonu ma le Alofa Mutimutivale o leova

E mafai ona tatou a’oa’oina ni lesona aogā mai i le faatulagaga o aai o sulufa’iga i Isaraelu anamua. I le mataupu muamua, ia iloilo po o ā auala e mafai ona sulufa’i atu ai tagata agasala iā leova i aso nei. I le mataupu lona lua, ia iloilo pe faapefea i le faaa’oa’oga a leova ona fesoasoani iā i tatou ina ia faamagalō ai isi, faatāua le ola, ma gaoioi ma le faamasinotonu.

18 “E Faatamaoaigaina le Tagata Limafoa’i”

20 VAIASO O IANUARI 15-21 Ia Teena Mafaufauga o le Lalolagi

25 VAIASO O IANUARI 22-28 Aua Ne’i Aveesea e se Mea lo Outou Tau

O loo faavae nei mataupu e lua i fautuaga a Paulo na avatu i Kerisiano i Kolose. O loo faamatala i le mataupu muamua mea e ao ona tatou faia pe a faalogo i ni manatu o le lalolagi atonu o loo fiafia pe talitonu ai tagata. O loo faamanatu mai i le mataupu lona lua auala e tatou te ‘alofia ai uiga e mafai ona aveesea ai faamanuiaga ua folafola mai e leova iā i tatou.

30 E Faapefea Ona E Faamasani i Lau Faapotopotoga Fou?

E lē faatauina lenei tusi. Ua saunia e a’oa’oina ai le Tusi Paia i le lalolagi aoao, ma ua lagolagoina e ala i foa’i tauofo.

Mo le faia o foa’i tauofo, taga’i i le www.jw.org.

LE **OLOMATAMATA**
FAASILASILAINA LE MALO O LEOVA

Se’i vaganā ua faailoa atu, ae o mau uma o loo i lenei tusi ua sii mai i le faaliliuga *O le Tusi Paia* —*O le Faaliliuga a le Lalolagi Fou*.

The Watchtower (ISSN 0043-1087) Issue 17 November 2017 is published monthly with an additional issue published in January, March, May, July, September, and November by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 1000 Red Mills Road, Walkill, NY 12589-3299, and in Australia by Watchtower Bible and Tract Society of Australia, 12-14 Zouch Road, Denham Court, NSW 2565. Periodicals Postage Paid at Brooklyn, NY, and at additional mailing offices. **POSTMASTER: Send address changes to Watchtower, 1000 Red Mills Road, Walkill, NY 12589-3299.** © 2017 Watch Tower Bible and Tract Society of Pennsylvania. Printed in Australia.

November 2017
Vol. 138, No. 17 SAMOAN



Ia Pepese Atu ma le Fiafia!

“E lelei ona fai pesea i lo tatou Atua.”—SALA. 147:1.

NA FAAPEA mai se tagata tusi pese lauiloa: “O upu e faaosofia ai manatu. O musika e faaosofia ai lagona. Ae o pese e pā’ia ai lou loto ma lagona ai se manatu.” E leai lava nisi pese e sili atu nai lo o pese e faaleo atu ai a tatou viiga ma le alolofa i lo tatou Tamā i le lagi o Ieova. E lētioa a avea pese ma vala tāua o le tapua’iga moni, e tusa pe e tatou te pepese na o i tatou pe faatasi ma le faapotopotoga o tagata o le Atua.

² O le ā la sou manatu e faatatau i le pese leotele faatasi ma le faapotopotoga? Pe e te matamuli e faia faapea? I nisi aganuu, e matamumuli tamāloloa e pepese a o iai faatasi ma isi tagata. O lenei vaiga e mafai ona iai se aafiaga i le faapotopotoga atoa, aemaise lava pe afai e lē pepese leotele toea’ina, pe faia fo’i nisi mea a o pepese le faapotopotoga.—Sala. 30:12.

³ Pe afai e tatou te manatu i le usuina o pese o se vaega tāua o la tatou tapua’iga, e mautinoa la o le a tatou lē manana’o e ō i fafo pe lē iai fo’i i taimi e usu ai pese o sauniga. O lea, ia fesili ifo: ‘O le ā la’u vaiga e faatatau i le usuina o pese i sauniga? E faapefea ona ou fo’ia so o se faalogona e ono taofia ai

1. O le ā e mafai ona tatou faia ona o pese?
- 2, 3. (a) O ā faalogona o nisi e faatatau i le pepese leotele faatasi ma le faapotopotoga? (e) O ā fesili o le a tatou talanoaina?

PESE: 10, 2

O LE Ā LAU TALII?

O le ā le tāua o pese i le tapua’iga moni?

E faapefea ona e fo’ia faalogona e faatalātū e pese, ma fai pesea iā Ieova mai le loto?

O ā vala ua faaleleia i la tatou tusi pese fou, ma e faapefea ona tatou faamasani i pese o loo iai?

a’u mai i le usuina fiafia ma le leotele o pese? O le ā ou te faia ina ia matuā faaleo atu ai faalogona o pese o loo tatou usuina?”

O PESE O SE VALA TĀUA O LE TAPUA’IGA MONI

⁴ Ua leva ona faaaogā e tagata tapua’i moni o Ieova musika e vivii atu ai iā Ieova. A o auuuna ma le faamaoni tagata Isaraelu iā Ieova, sa tūa tele le usuina o pese i la latou tapua’iga. O se faaa’oa’oga, ina ua sauni le auunaga i le malumalu, sa faamaopoopo e le tupu o Tavita tagata sa Levī e to’ā 4,000 ina ia saunia musika o viiga. E aofia ai iā i latou na le to’ā 288 o ē “na a’oa’oina i pesega iā Ieova, o tagata tomai uma.”—1 No. 23:5; 25:7.

⁵ Sa avea musika ma le usuina o pese o se vaega autū o le faapaiaga o le malumalu. Ua ta’ua e faapea: “Ina ua peisea’i ua tasi le leo o ē e ilia pū ma ē e pepese i viiga ma faafetai iā Ieova, ma ina ua sii a’e o latou leo i pū, o sumepalo, ma meafaifaaili e tā ai pese ma viiga o Ieova . . . ua tumu le fale o le Atua moni i le mamalu o Ieova.” E mautinoa o lenei sauniga na faamalosi ai le faatuatua o tagata!—2 No. 5:13, 14; 7:6.

⁶ Ina ua ta’imua Neemia i tagata Isaraelu i le toe fausiaina o pā o Ierusalem, sa ia faamaopoopo fo’i tagata pepese sa Levī faatasi ai ma le tāina o meafaifaaili. Ina ua faapaiaina pā na toe fausia, sa avea musika faapitoa na usuina ai ma pogai na matuā olioli ai tagata i lenā sauniga. Sa iai “ni ‘aufaipese to’atele se lua e usuina viiga o le faafetai.” Na esese itu na savavali mai ai nei ‘aufaipese i luga o le pā, ona feiloa’i lea e lata i le vaega na iai le malumalu, ina ia mafai ona

4, 5. O le ā le tele o sauniuniga na faia mo le usuina o pese i le tapua’iga i Isaraelu anamua?

6. Faamatala mai le auala faapitoa na usu ai pese i le taimi na avea ai Neemia ma kovana i Ierusalem.

lagona mai i mea mamao a latou pese. (Nee. 12:27, 28, 31, 38, 40, 43) E mautinoa na fiafia le finagalo o Ieova a o faafofoga mai i ona tagata tapua’i o loo viivii atu ma le fiafia iā te ia e ala i pese.

⁷ Ina ua faavaeina le faapotopotoga Kerisiano, sa faaaauu ona avea musika ma vala tūa o le tapua’iga moni. Sa faaaofia e Iesu le usuina o pese ina ua mavae le Talisuga Afiafi a le Alii, o le pō lea e sili ona tūa i le talafaasolopito o tagata.—**Faitau le Mataio 26:30.**

⁸ Sa faataatia e Kerisiano i le ulua’i senituri se faaa’oa’oga o le vivii faatasi atu i le Atua i pese. Sa masani ona latou feiloa’i i fale o aiga mo la latou tapua’iga. E ui atonu sa faatauvaa na nofoaga, ae e le’i taofia ai i latou mai i le pepese atu ma le fiafia iā Ieova. Na faapea atu le aposetolo o Paulo i ona uso Kerisiano: “Ia faaaauu ona a’oa’o ma apoapoa’i atu le tasi i le isi i salamo, o viiga i le Atua, o pese mananaia faaleagaga, ia pepese iā Ieova mai i o outou loto.” (Kolo. 3:16) O le mea moni, o pese o loo i la latou tusi pese, o ni “pese mananaia faaleagaga” e ao ona usuina ma le lotofaafetai. O nisi na o mea’ai faaleagaga ua saunia mai e le “pologa faamaoni ma le faautauta.”—Mata. 24:45.

FO’IA FAALOGONA O LE FAATALATŪ E PEPESE

⁹ Ae faapefea pe afai e lē o se tū masani i lou aiga, lau aganuu, po o le vaipanoa

7. Na faapefea ona faamatilatila e Iesu le tūa o le usuina o pese i le tapua’iga faa-Kerisiano?

8. Na faapefea ona faataatia e Kerisiano i le ulua’i senituri se faaa’oa’oga i le usuina o pese i le tapua’iga?

9. (a) O le ā e ono taofia ai nisi mai i le pepese ma le fiafia i a tatou sauniga ma fonotaga? (e) O le ā le auala e tatau ona tatou usu ai pese o viiga iā Ieova, ma o ai e tatau ona tausolomua ai? (Taga’i i le ata i luga a’e o le matua.)


AUALA E FAALELEIA AI LOU USUINA O PESE

(Taga'i i le palakalafa e 11-14)

la tū sa'ō
faalelei



la mānava tele
i totonu



la tatala tele
lou fofoga



la pese leotele



o e nofo ai le usuina o pese? Talu ai ua faatupula'ia faiga faatekinolosi faaonapōnei, atonu la e te fiafia e faalogo-logo i tagata pepese lauiloa. Atonu e te matamuli pe e te lē fiafia fo'i pe a e faatusatusa lou leo i tagata pepese ta'uta'ua. Peita'i, e lē tatau ona aveā lenā ma māfua-aga e lē faia ai lau matafaioi o le pese atu o viiga iā Ieova. Nai lo o lea, ia tuu i luga lau tusi pese, ia faasa'o i luga lou ulu, ona pese loa lea mai i lou lotu! (Esera 3:11; **faitau le Salamo 147:1.**) O le tele o Maota mo Sauniga i aso nei ua faaali mai upu o pese i luga o TV ina ia fesoasoani iā i tatou i le usuina o pese. O se mea e mata'ina fo'i ona ua faaafia i le A'oga o le Faiva o le Malo mo toeaina le usuina o pese o le Malo. Ua faamatilatila mai ai, e tāua i toeaina ona tausolomua i le usuina o pese i le faapotopotoga.

¹⁰ O se tasi o mea e māfua ai ona lē pe-

10. O le ā e tatau ona tatou manatua pe afai e tatou te popole e pepese leotetele?

pese leotetele le to'atele, ona o le popole. Atonu e popole ina ne'i matilatila ese o latou leo pe e lē manaia fo'i i le faalogo a isi. Peita'i, ia manatua "e sesē i tatou uma i mea e tele" pe a tatou tautatala. (Iako. 3:2) Ae e lē taofia ai lava i tatou mai i le talanoa atu i isi. Aiseā la e taofia ai fua i tatou mai i le pepese atu i viiga iā Ieova ona e lē lelei o tatou leo?

¹¹ Atonu e tatou te faatalatū e pepese ona e tatou te lē mautinoa i le **auala** e pepese ai. Peita'i, e mafai ona faaleleia le auala e tatou te pepese ai e ala i le faata-tau o nisi o fautuaga faigofie.*

¹² E mafai ona a'o le auala e te pese malosi ai ma le leotele e ala i le **mānava** faalelei. E pei lava ona ola se molī ona o le

* Mo nisi fautuaga i le auala e faaleleia ai o tatou leo pe a pepese, taga'i i le polokalame faa-Peretania o Tesema 2014 i le TV i le Initaneti a Molimau a Ieova (vaega o video i le FROM OUR STUDIO).

11, 12. O ā nisi o fautuaga i auala e faaleleia ai lo tatou usuina o pese?

eletise, e faapena fo’i ona malosi lou leo pe a e mānava lelei a o e tautala pe pese. E tatau ona e pese leotele e pei lava ona e leotele pe a e tautala, pe sili atu fo’i. (Taga’i i fautuaga o loo i le tusi *Mauaina o Aogā Mai i le A’oga o le Faiva Faatiokarate*, itulau e 181 i le 184, i le tama’i ulutala “Faatonutonu Faalelei Lau Mānava.”) O le mea moni, o nisi taimi e faatonuina ai e le Tusi Paia tagata tapua’i o Ieova ia “alalaga fiafia” a o pepese.—Sala. 33:1-3.

¹³ Ia faata’ita’i auala nei a o fai la outou tapua’iga a le aiga pe na o oe fo’i: Filifili se pese sauniga e te fiafia i ai. Ia faitau leotele upu o le pese i se leo malosi ma mautinoa. Pe a uma, ia **mānava tasi i totonu** ma toe ta’u upu uma o se laina e tasi, ona usu loa lea o lenā laina i le malosi lava lenā o lou leo. (Isa. 24:14) O le i’uga, o le a malosi lou leo ma o se mea lelei lenā. Aua e te popole pe matamuli fua!

13. Faamatala mai le auala e mafai ona tatou pepese ai ma le mautinoa.

¹⁴ E lē mafai ona malosi lou leo se’i vaganā ua tatala tele lou fofoga. O le isi la fautuaga, o le tatala tele lea o lou fofoga e sili atu nai lo o le mea e masani ai pe a e tautala. O le ā e tatau ona e faia pe afai e te manatu e vaivai lou leo pe atonu fo’i e ‘ī’ī tele? E te maua ni fautuaga talafeagai i le tusi *Mauaina o Aogā Mai i le A’oga o le Faiva Faatiokarate*, itulau e 184, i le pusa “Fo’ia o Faafitauli Patino.”

IA USU VIIGA MAI I LE LOTO

¹⁵ Na lagona le fiafia i le fono faaletausaga a Molimau a Ieova iā Oketopa i le 2016, ina ua faasilasila e le uso o Stephen Lett o le Vaega Pule, ua lē o toe umi ona maua lea o la tatou tusi pese fou ua faamatuaina ‘*Pepese Fiafia’ iā Ieova*. Na

14. (a) O le ā se isi mea e tatou te faia ina ia malolosi ai o tatou leo? (Taga’i i le pusa “Auala e Faaleleia ai Lou Usuina o Pese.”) (e) O ā ni fautuaga ua e iloa e aogā ina ia fo’ia ai faafitauli i o tatou leo?

15. (a) O le ā le faasilasilaga na faia i le fono faaletausaga i le 2016? (e) O ā nisi o mǎfuaaga ua saunia ai le tusi pese fou?

Ia a’o le usuina o pese i le taimi o la outou tapua’iga a le aiga (Taga’i i le palakalafa e 18)



faamatala e le uso o Lett o se tasi o māfua-aga ua toe fai ai lenei teuteuga, ina ia ōgatusa pese ma le toe teuteuga o le *Faaliliuga a le Lalolagi Fou* i le faa-Peretania. Na tatau ona aveese pe toe fetuuna'i upu o pese o loo faaaogā ai faaupuga e lē toe maua i le toe teuteuga o le *Faaliliuga a le Lalolagi Fou* lea na tatala i le 2013. Ua faaopoopo fo'i i ai pese fou e faatatau i la tatou galuega tala'i, ma pese e faaleo atu ai lo tatou lotofaafetai mo le togiola. E lē gata i lea, talu ai o pese o se vaega tāua o la tatou tapua'iga, na manana'o la le Vaega Pule ia saunia se tusi pese e anagatā e tutusa ma le faavaa o le *Faaliliuga a le Lalolagi Fou* lea ua toe teuteuina.

¹⁶ Ina ia faigofie ona faaaogā le tusi pese '*Pepese Fiafia*' iā leova, ua faatulaga lelei pese i mataupu eseese. O se faaa'oa'oga, o pese muamua e 12 o loo faatatau atu iā leova, o pese e 8 e sosoo ai o loo faatatau atu iā Iesu ma le togiola, ma faasolo atu ai i isi mataupu. O loo iai se faasino mataupu e mafai ona faaaogā pe a su'e se pese, e pei o se pese mo se lauga lautele.

¹⁷ Ina ia fesoasoani i tagata uma ia pepese mai i le loto, o nisi pese ua toe fetuuna'i upu ina ia faamanino atili ai se manatu. O se faaa'oa'oga, o le pese sa faamatuaina "Ia Faapalepale," ua sui i le "Ia Outou Onosa'i," ma ua fetuuna'i fo'i upu ina ia ōgatusa ma le matua. Ua talafeagai fo'i ona sui le matua o le pese "Ia Leoleoina Lou Loto," i le matua e faapea "Ia Tatou Leoleo o Tatou Loto." Aiseā? Talu ai o le to'atele o tagata e iai i a tatou sauniga, fonotaga, ma tauaofiaga, o tagata fou, tagata fiafia, talavou, ma tuafāfine. Pe a latou usuina la upu o le pese "Ia Leoleoina Lou Loto," e ono lē lelei o latou

16, 17. O ā vala ua toe fetuuna'i i la tatou tusi pese fou?

faalogona ona e peisea'i o loo latou faatonu atu isi i le mea e tatau ona fai. O lea la ua toe teuteu ai le matua ma upu o lenā pese.

¹⁸ O le tele o pese i lenei tusi pese fou ua pei o ni tatalo. E mafai ona e faaleo atu ou faalogona loloto iā leova e ala i nei pese. O isi pese o le a fesoasoani "ina ia faatupu ai [iā i tatou] le alofa ma galuega lelei." (Epe. 10:24) E mautinoa e tatou te manana'o ia faamasani i fati, o le saosasoa ma le lemū, faapea upu o a tatou pese. E mafai ona e faia faapea e ala i le faalogo- logo i pese ua usuina o loo maua i le jw.org i le faa-Peretania. Pe afai e a'o le usuina o pese i le fale, o le a mafai la ona e pese ma le mautinoa mai i lou loto.*

¹⁹ Ia manatua, o le usuina o pese o se vala tāua o la tatou tapua'iga. O se auala lelei tele lea e faaalua atu ai lo tatou alofofa ma le talisapaia o leova. (**Faitau le Isaia 12:5.**) Pe afai e te pese leotele ma le fiafia, o le a faalaeiau ai fo'i isi ina ia pepese ma le mautinoa. O tagata uma lava i le faapotopotoga, o ē iti, matutua, ma tagata fou, e mafai ona afaatasi i lenei auala tuusa'o e tapua'i atu ai iā leova. O lea, aua e te faatalatū e pese mai i lou loto. Nai lo o lea, ia faatatau le faatonuga manino a le faisalamo e faapea: "Inā pepese atu ia iā leova!" Ioe, ia pepese atu ma le fiafia!—Sala. 96:1.

* Ina ia sauniunia i tatou e usu pese, e amata vaega ta'itasi o polokalame o fonotaga ma tauaofiaga i se vitiō o musika e sefulu minute le umi. O nei musika o loo tāina e le faaili, ua tuufaatasia ina ia sauniunia ai o tatou loto ma mafaufau mo le polokalame o le a sosoo mai. O lea la, e faalaeiauina i tatou ia nofoi i o tatou nofoa i le amata- taga ina ia faalogologo lelei i nei musika.

18. Aiseā e tatau ai ona tatou faamasani i pese o la tatou tusi pese fou? (Taga'i fo'i i le faaopoopoga i le pito i lalo.)

19. E faapefea i tagata uma i le faapotopotoga ona faia se sao tuusa'o i le tapua'iga iā leova?



Po o E Sulufa'i Atu iā Ieova?

“E lavea'iina e Ieova ana auauna; e lē ta'usalaina fo'i i latou uma o ē e sulufa'i atu iā te ia.”—SALA. 34:22.

PESE: 8, 54

O LE Ā E TATOU TE A'OA'OINA MAI I LE FAATULAGAGA O AAI O SULUFA'IGA E FAATATAU . . .

i le matafaioi a toeaina ia toe faamalosi faaleagaga se tasi na faia se agasala matuiā?

i le tāua o le vave faia o se gaoioiga ina ia maua ai le alofa mutimutivale o le Atua?

i le faamagaloga atoatoa a Ieova?

“AUĒ o a'u o le tagata malaia!” (Roma 7:24) E to'atele auauna faamaoni a le Atua ua tofo i lagona e pei o le aposetolo o Paulo. O i tatou uma ua aafia i le agasala tuufaasolo, ma pe a lē ōgatusa a tatou gaoioiga ma le faanaunauga e faafiafia Ieova, e tatou te lagona le lotomafatia. O nisi Kerisiano na latou faia se agasala matuiā ma na manatu e lē mafai ona faamagaloina i latou e le Atua.

² Peita'i, ua faamautinoa mai i le Tusi Paia o i latou e sulufa'i atu iā Ieova e lē tatau ona iai ni lagona o loo ta'usalaina i latou. (**Faitau le Salamo 34:22.**) O le ā e aofia ai i le sulufa'i atu iā Ieova? O ā laasaga e tatau ona tatou uia ina ia maua ai le alofa mutimutivale ma le faamagaloga a Ieova? E tatou te maua tali o nei fesili e ala i le iloilo o le faatulagaga o aai o sulufa'iga i Isaraelu anamua. E moni o lenā faatulagaga na faia i lalo o le feagaiga o le Tulafono lea na suia i le Penetekoso 33 T.A. Ae ia manatua, o Ieova na saunia le Tulafono. O lea la, o Ieova faatulagaga o aai o sulufa'iga e tatou te a'oa'oina ai le silafaga a Ieova e faatatau i le agasala, tagata agasala,

1. O ā lagona o le to'atele o auauna faamaoni a le Atua ona o le tulaga agasala?

2. (a) E faapefea ona faailoa mai i le Salamo 34:22 e lē tatau i auauna a le Atua ona iai ni lagona o loo ta'usalaina i latou? (e) O le ā o le a tatou talanoaina i Ieova i lenei mataupu? (Taga'i i le pusa “Lesona po o le Faataunuuga?”)

ma le salamō. Muamua, se’i o tatou tilofa’ia le fuafuaga ma le auala na faagaoioi ai nei aai o sulufa’iga.

“IA TOFIA MO OUTOU AAI O SULUFA’IGA”

³ E le’i manatu māmā Ieova i so o se gaioi-oiga faamasaatoto i Isaraelu anamua. O sē na fasioti tagata faamoemoeina, e fasiotia o ia e “lē na te tauimasui i le toto,” o se tane lea e aiga vavalalata ma lē ua maliu. (Nu. 35:19) O lenei gaioi-oiga na tau ai le toto o le tagata lē sala lea ua faamaligiina. O le vave faia o lenā faasalaga oti na puipuia ai le Nuu Folafoalaina mai i le faaleagaina, auā na faatonuina e Ieova, “aua fo’i tou te faaleagaina le laueleele, auā ua faaleagaina le laueleele i le [faamaligiina o le] toto” o tagata.—Nu. 35:33, 34.

⁴ Ae na faapefea ona feutaga’i tagata Isaraelu ma sē na fasioti tagata pa’ivalea? E ui e le’i fuafuaina le gaioi-oiga na ia faia, ae na nofosalava o ia i le faamasaaina o le toto o le tagata e lē sala. (Kene. 9:5) Peita’i, na iai se faatulagaga alofa na faataga ai lē na fasioti tagata pa’ivalea e sola ese mai i lē na te tauimasui i le toto, ma sulufa’i atu i se tasi o aai o sulufa’iga e ono na iai. O i inā na maua ai e lē na fasioti tagata pa’ivalea le puipuiga, ma na tatau ona nofo ai i totonu o le aai o sulufa’iga se’ia maliu le ositaulaga sili.—Nu. 35:15, 28.

⁵ E le’i tofiaina e tagata nei aai e avea ma aai o sulufa’iga. O Ieova lava ia na faatonuina Iosua: “Ia e fai atu i le fanauga a Isaraelu e faapea, ‘Ia tofia mo outou aai o sulufa’iga.’” O na aai sa “faapaiaina.” (Iosua 20: 1, 2, 7, 8) Talu ai o Ieova na faatulagaina nei aai mo se fuafuaga faapitoa, e tatou te ono fesili la: E faapefea i lenei faatulagaga ona fe-

3. Na faapefea ona feutaga’i tagata Isaraelu ma sē na fasioti tagata faamoemoeina?

4. Na faapefea ona feutaga’i tagata Isaraelu ma sē na fasioti tagata pa’ivalea?

5. E faapefea ona fesoasoani le faatulagaga o aai o sulufa’iga ina ia tatou malamalama lelei ai iā Ieova?

soasoani e tatou te malamalama lelei ai i le alofa mutimutivale o Ieova? O le ā e tatou te a’oa’oina mai ai i le auala e sulufa’i atu ai iā Ieova i aso nei?

‘IA TAUTALA ATU A O FAALOGOLOGO MAI TOEAINA’

⁶ Pe afai na faafuase’i ona fasiotia se tasi, e tatau i lē na fasioti tagata pa’ivalea ona sola atu i le aai o sulufa’iga, ma muamua “tautala atu a o faalogologo mai toeaina” o loo i le faitoto’a o le aai. E tatau ona talileleia o ia e toeaina. (Iosua 20:4) I se taimi mulimuli ane, e toe auina atu o ia i toeaina o le aai lea na ia fasiotia ai le tagata, ma e latou te faia lona faamasinoga. **(Faitau le Numera 35:24, 25.)** E faato’ā mafai ona toe faafo’i o ia i le aai o sulufa’iga pe afai e faamaonia e le’i fuafuaina le gaioi-oiga na ia faia.

⁷ Aiseā na tatau ai ona ia talanoa atu i toeaina? Na tatau i toeaina ona latou faatumauina le mamā o le nuu o Isaraelu, ma fesoasoani i lē na fasioti tagata pa’ivalea ina ia maua le alofa mutimutivale o Ieova. Na tusi se faitofā o le Tusi Paia pe afai e lē alu atu le tagata sulufa’i i toeaina, “o le a lamatia lona ola.” Na ia ta’ua atili: “O le a pa’ū lona toto iā te ia lava ona e na te le’i faaaogā tatau le puipuiga na saunia e le Atua.” Na iai le fesoasoani mo lē na fasioti tagata pa’ivalea, peita’i, na tatau ona ia sa’ili ma talia lenā fesoasoani. Pe a lē sola atu o ia i se aai o sulufa’iga na tofia e Ieova, na sa’oloto la le tauaiga vavalalata o lē ua maliu e fasioti o ia.

⁸ I aso nei, e mana’omia i se Kerisiano ua faia se agasala matuiā ona sa’ili le fesoasoani a toeaina o le faapotopotoga, ina ia toe faaleleia ai lona tulaga. Aiseā e tāua ai

6, 7. (a) Faamatala le matafaioi a toeaina i le faamasinoina o lē na fasioti tagata pa’ivalea? (Taga’i i le ata i luga a’e o le matua.) (e) Aiseā o se gaioi-oiga atamai ai i le tagata sulufa’i ona talanoa atu i toeaina?

8, 9. Aiseā e tatau ai i se Kerisiano na faia se agasala matuiā ona talanoa atu i toeaina?

lenei laasaga? Muamua, o Ieova na saunia le faatulagaga ina ia taulima e toeaina agasala matuiā, e pei ona ta’ua i lana Afioa. (Iako. 5: 14-16) Lua, o lenei faatulagaga e fesoasoani i le tagata faimea sesē ua salamō, ina ia tumau ai i le tausiga a le Atua ma ‘alofia ai le faaauau ona fai o le agasala. (Kala. 6:1; Epe. 12:11) Tolu, ua tofia ma toleniina toeaina ina ia faalaeiau i ē faimea sesē ua salamō, ma fesoasoani e tuuititia o latou tigā ma faalogona nofosalā. Na fetalai Ieova o nei toeaina o ni “mea e malu ai mai i timuga mamafa.” (Isa. 32:1, 2) Pe e te lē ioe o lenei faatulagaga o se faamaoniga o le alofa mutimutivale o le Atua?

⁹ O le to’atele o auauna a le Atua ua latou maua le mapusaga e ala i le sa’ili atu ma maua le fesoasoani mai i toeaina. O se faa’oa’oga, na faia e se uso e igoa iā Daniel se agasala matuiā, ma na faatalatū o ia i le tele o masina e talanoa atu i toeaina. Na ia ta’utino mai, “Ina ua mavae se taimi umi, na ou manatu e leai se mea e mafai ona toe fai e toeaina e fesoasoani ai iā te a’u. Peita’i, sa ou popole ina ne’i iloa e se isi la’u agasala ma ou selesele ai i āuga o le mea sesē na ou faia. O taimi uma ou te tatalo ai, sa ou manatu e

tatau ona amata a’u tatalo i le faatoese atu iā Ieova ona o la’u agasala.” Mulimuli ane, na sa’ili atu Daniel i le fesoasoani a toeaina. Pe a toe tepa i tua, ua faapea mai o ia: “O le mea moni na ou fefe e talanoa atu i toeaina. Ae ina ua ou faia faapea, na peisea’i na aveese atu e se tasi se avega mamafa na ou tauaveina. I le taimi lenei, ua mafai ona ou tatalo atu iā Ieova e aunoa ma se mea e faalavelave ai.” Ua maua nei e Daniel se lotofuataifoa mamā, ma na tofia talu ai nei o ia o se auauna o le faiva.

“IA SOLA O IA I SE TASI O NEI AAI”

¹⁰ Na tatau i lē na fasioti tagata pa’ivalea ona vave gaoioi ina ia maua le alofa mutimutivale o Ieova. Na tatau ona ia **sola** atu i se aai o sulufa’iga na sili ona latalata ane. (**Faitau le Iosua 20:4.**) E faigatā ona tatou faaata se tagata sulufa’i e lē ano i le mea ua tupu, auā na faalagolago lona ola i le sola atu i le aai o sulufa’iga i le vave e mafai ai ma nofo ai i inā! E tele mea na tatau ona ia faataulagaina. Na

10. O le ā le gaoioiga na tatau ona vave faia e se na fasioti tagata pa’ivalea ina ia maua ai le alofa mutimutivale o Ieova?

Lesona po o le Faataunuuga?

I le taufaai’ui’uga o le senituri 19, na taula’i atu ai *Le Olomatamata* i le uiga faavaloaga o aai o sulufa’iga. Na ta’ua i le lomiga o Setema 1, 1895: “O lenei vala o le Tulafono a Mose na faaata mai ai le sulufa’i atu o se tagata agasala i le Keriso. O le sulufa’i atu iā te ia ma le faatua-tua, e maua ai le puipuiga.” I le

senituri mulimuli ane, na faamatalaina ai i *Le Olomatamata* o le aai o sulufa’iga e faaata mai ai le “faatulagaga a le Atua e puipuia ai i tatou mai i le oti ona o le solia o lana tulafono i le paia o le toto.”

Peita’i, i *Le Olomatamata* o Mati 15, 2015, na faamatala mai ai le māfuaaga ua seāseā ai toe faaogā i a tatou lomiga i aso nei le faaata faavaloaga ma le faataunuuga o se mea. Ua ta’ua

i lenā lomiga: “Ua tatou taliaina mau ua aumaia ai faaata o se tagata, o se mea na tupu po o se isi lava mea. Ae e lē tatau ona tatou faia se faaata o se tagata po o se tala pe a leai se faavae faale-Tusi Paia.” Talu ai e lē o ta’ua i le Tusi Paia se faataunuuga faavaloaga o aai o sulufa’iga, o loo ua’i atu la lenei mataupu ma le mataupu o sosoo mai i **lesona** e mafai ona a’oa’oina e Kerisiano mai i lenei faatulagaga.

tatau ona ia tuua lana galuega, se olaga sologa lelei i lona aiga, ma le sa'olotoga e fealua'i ai se'ia maliu le ositaulaga sili.* (Nu. 35:25) Peita'i, na matuā tauia ana taumafaiga. Pe a ia toe tuua le aai o sulufa'iga, ua faaalii ai lona matuā lē popole i le toto na ia faamaliina, ma o le a lamatia ai fo'i lona ola.

11 I aso fo'i nei, e tatau i tagata faimea sesē ua salamō ona latou faia se gaoioiga ina ia maua ai le alofa mutimutivale o le Atua. E tatau ona tatou lafoa'ia atoatoa le ala agasala, faamamao mai i agasala matuiā faapea fo'i agasala lāiti lea e i'u atu ai i le faia o agasala matuiā. Na faagaeina le aposetolo o Paulo e faamatala mai gaoioiga a Kerisiano i Korinito na salamō. Na tusi o ia e faapea: "Ua outou matuā filigā ai, ua ta'umamāina ai outou, ua outou lototigā ai, ua outou matata'u ai, ua outou naunau tele ai, ua outou maelega ai e faasa'o mea sesē!" (2 Kori. 7:10, 11) O taumafaiga maumaua'i e lafoa'ia se ala agasala, e faailoa atu ai iā Ieova e tatou te lē o manatu māmā i le mea na tupu, ma e tatou te lē o faaogā sesē lona alofa mutimutivale.

12 O ā nisi o mea e ono mana'omia ona lafoa'ia e se Kerisiano ina ia faaauau ai ona ia mauaina le alofa mutimutivale o le Atua? E tatau ona nofosauini e lafoa'i e oo lava i mea e pele iā te ia pe afai e faaosoosoina ai o ia e faia le agasala. (Mata. 18:8, 9) Pe a uuna'ia oe e nisi o au uō e fai ni mea e lē fiafia i ai le finagalo o Ieova, po o le a e taofia le toe faifaima faatasi ma i latou? Pe afai e faigatā ona e pulea lau inu i le 'ava malosi, po o le a e taumafai e faamamao ese mai i tulaga e ono faaosoosoina ai oe e inu tele? Pe afai o loo e tauivi ma

* E tusa ai ma tusitusiga a tagata lutaia, e foliga mai na ō atu le aiga o lē na fasioti tagata pa'ivalea ma latou nonofo faatasi i totonu o le aai o sulufa'iga.

11. O ā gaoioiga e faia e se Kerisiano ua salamō e faaalii ai e na te lē o faaogā sesē le alofa mutimutivale o le Atua?

12. O ā mea e ono mana'omia ona lafoa'ia e se Kerisiano ina ia maua ai pea le alofa mutimutivale o Ieova?

tu'inanauga lē mamā taufeusua'iga, po o le a e 'alofia ni ata tifaga, upega tafa'ilagi, po o isi mea e ono faaosofia ai ni mafaufauga lē mamā? Ia manatua o so o se mea e tatou te lafoa'ia mo Ieova, e matuā aogā ina ia faatua ma iina ai lo tatou faamaoni iā te ia. E leai se isi mea e sili atu ona tigā nai lo o teena e Ieova. I le taimi e tasi, e leai se mea e sili atu ona faamalieina ai nai lo o le mauaina o lona "alofa faamaoni i aso uma lava."—Isa. 54:7, 8.

"IA AVEA MA AAI O SULUFA'IGA MO OUTOU"

13 O le taimi lava na taunuu ai le tagata sulufa'i i se aai o sulufa'iga, na saogalemu o ia. Na fetalai Ieova e faatatau i na aai: "Ia avea ma aai o sulufa'iga mo outou." (Iosua 20:2, 3) E le'i finagalo Ieova e toe faamasinoina le fasioti tagata pa'ivalea mo le solitulafono lava lea e tasi, pe faataga lē na te tauimasui i le toto e alu atu i totonu o le aai ma fasioti le tagata sulufa'i. E lē mana'omia ona fefe le tagata sulufa'i ina ne'i tauimasui atu se tasi iā te ia. A o iai i totonu o le aai, na saogalemu ma malupuipua o ia i le puipua a Ieova. O lenā aai e lē o se **falepuipui**. Na mafai e le tagata sulufa'i ona faigaluega, fesoasoani i isi, ma auauna iā Ieova ma le filemu. Ioe, na mafai ona ia maua se olaga fiafia ma faamalieina!

14 O nisi o auauna a le Atua na faia ni agasala matuiā a ua salamō, na faaauau ona faapologaina i lagona nofosala. Na latou manatu e faavavau ona silasila Ieova iā i latou o ni tagata na agasala matuiā. Pe afai e faapena ou faalogona, ia e mautinoa pe a faamagalalo oe e Ieova, ua ia faamagaloina atoatoa oe ma e lē tatau ona e toe lagona le nofosala. Na iloa e Daniel lea na ta'ua i le amataga le moni o lenei manatu. Ina ua uma ona taulima e

13. Aiseā na mafai ai ona maua e le tagata sulufa'i le saogalemu, malupuipua, ma le fiafia a o iai i le aai o sulufa'iga?

14. O le ā e tatau ona mautinoa i ai se Kerisiano ua salamō?



Ia e mautinoa i le faamagaloga a Ieova
(Taga'i i le palakalafa e 14-16)

toeaina le mataupu ma fesoasoani iā te ia e toe maua se lotofuatiāifo mamā, na ia faapea mai: “E pei ua mafai ona ou toe mānava. Ina ua uma ona taulima lelei le mataupu, ou te le'i toe lagona le nofosala. E uma loa ona faamagalo se agasala, ua mou atu e faavavau lenā agasala. E pei lava ona fetalai Ieova, e na te aveesea a tatou avega mamafa ma faamamao ese mai iā i tatou. E te lē toe vaai lava i ai.” O le taimi lava e iai le tagata sulufa'i i totonu o le aai o sulufa'iga, e lē tatau ona toe popole ina ne'i maua o ia e lē na te tauimasui i le toto. I se tulaga talitutusa, o le taimi lava e faamagalo ai e Ieova a tatou agasala, e lē tatau ona tatou popole o le a toe lāgā e Ieova lenā agasala, pe toe faamasinoina ai fo'i i tatou. —**Faitau le Salamo 103:8-12.**

¹⁵ O le mea moni, e tele atu māfuaaga e tatou te mautinoa ai nai lo o tagata Isaraelu i le alofa mutimutivale o Ieova. Ina ua uma ona faaleo mai e Paulo lona faanoanoa i le lē mafai ona ia ususita'i atoatoa iā Ieova, na faapea mai o ia: “Ia faafetaia le Atua ona o lo tatou Alii o Iesu Keriso!” (Roma 7:25) Ioe, e ui lava

15, 16. E faapefea i le avea ai o Iesu ma Lē e togilaina i tatou ma o le Ositaulaga Sili, ona faamalosia ai lo tatou mautinoa i le alofa mutimutivale o le Atua?

na tauivi o ia ma le agasala faapea ana mea sesē i le taimi ua te'a ia na salamō mai ai, ae na ia mautinoa o le a ia maua le faamagaloga a le Atua e ala iā Iesu. I le avea ai o Iesu ma Lē e togilaina i tatou, ua ia faamamā o tatou lotofuatiāifo ma foa'i mai le filemu o le mafufau. (Epe. 9:13, 14) I le avea ai o Iesu ma o tatou Ositaulaga Sili, “ua mafai ai ona ia faalaina atoatoa i latou e faalatalata atu i le Atua e ala iā te ia, auā o loo soifua pea o ia e 'ai'oi atu mo i latou.” (Epe. 7:24, 25) Pe afai o le matafaioi a le ositaulaga sili na faamautinoa atu ai i tagata Isaraelu ua faamagaloina a latou agasala, e sili atu la ona tatou mautinoa e 'tatou te maua le alofa mutimutivale ma le agalelei faifua o le Atua e fesoasoani mai i le taimi e tatau ai,' ona o le auunaga a lo tatou Ositaulaga Sili o Iesu.—Epe. 4:15, 16.

¹⁶ O lea la, ina ia o tatou sulufa'i atu iā Ieova, e ao ona tatou faatuatua i le taulaga togioa a Iesu. Aua le tau ina manatu e tāua le taulaga togioa mo tagata uma. Nai lo o lea, ia e faatuatua o le togioa e mo **oe**. (Kala. 2: 20, 21) Ia e faatuatua o le togioa o le faavae lea mo le faamagaloina o **au** agasala. Ia e faatuatua o le togioa ua e maua ai le faamoemoe mo le ola e faavavau. Ioe, o le taulaga togioa a Iesu o le meaalofa a Ieova mo **oe**.

¹⁷ O aai o sulufa'iga ua faaalua mai ai le alofa mutimutivale o Ieova. O lenei faatulagaga e lē gata na faamatilatila ai e le Atua le paia o le ola, ae na faata'ita'i mai ai fo'i le auala e fesoasoani mai ai toeaina iā i tatou, o mea e aofia ai i le salamō moni, ma le māfuaaga e tatou te maua faatuatua ina atoatoa ai le faamagaloga a Ieova. Po o e sulufa'i atu iā Ieova? E leai lava se isi mea e te maua ai le saogalemu moni ua na o Ieova! (Sala. 91:1, 2) I le mataupu o sosoo mai, o le a tatou iloiloaina ai pe faapefea i aai o sulufa'iga ona fesoasoani iā i tatou, e faaa'oa'o ai i le faaa'oa'oga silisili a Ieova o le faamasinotonu ma le alofa mutimutivale.

17. Aiseā ua e mana'o ai e sulufa'i atu iā Ieova?



Ia Faaa'oa'o i le Faamasinotonu ma le Alofa Mutimutivale o Ieova

“Ia outou faamasino i le faamasinotonu; ia faaaauu ona alofa faamaoni ma alofa mutimutivale le tasi i le isi.”—SAKA. 7:9.

SA MATUĀ tāua iā Iesu le Tulafono a Mose. E lē faate'ia ai i tatou auā o le Tulafono e mai i Lē e pito i sili ona tāua i le olaga o Iesu, o lona Tamā o Ieova. O le matuā fiafia o Iesu i tulafono a le Atua na valoia mai i le Salamo 40:8: “Lo'ū Atua e, ou te fiafia e fai lou finagalo, ua i totonu fo'i iā te a'ū lau tulafono.” Na faamautinoa mai i upu ma gaioioga a Iesu o le Tulafono a le Atua e atoatoa ona lelei, e aogā, ma e mautinoa e faataunuūina.—Mata. 5:17-19.

² Pagā le faanoanoa o Iesu a o vaai atu o faauigasesē e le 'autusiupu ma le 'au Faresaio le Tulafono a lona Tamā! Na latou soona tausia vaega lāiti o le Tulafono, o lea na fetalai atu ai Iesu iā i latou: “Ua outou avatu mea e sefulua'i o le mili, o le aneto, ma le kumina.” O le ā lo latou faafitauli? Na fetalai atili Iesu: “Peita'i ua outou manatu māmā i mataupu matuā tāua o le Tulafono, e pei o le faia o mea tonu, o le alofa mutimutivale, ma le faamaoni.” (Mata. 23:23) I le lē pei o lenā 'au Faresaio faafiaamitonu, na malamalama Iesu i le agaga o le Tulafono, ma uiga o le Atua na atagia mai i poloa'iga ta'itasi.

³ I le avea ai ma Kerisiano, e tatou te lē o toe iai i le feagaiga o le

- 1, 2. (a) O le ā le manatu o Iesu e faatatau i le Tulafono a le Atua? (e) Na faapefea ona faauigasesē e le 'autusiupu ma le 'au Faresaio le Tulafono?
3. O le ā o le a tatou talanoaina i lenei mataupu?

PESE: 125, 88

PE E MAFAI ONA E FAAMATALA?

E faapefea ona tatou faaa'oa'o i le alofa mutimutivale o Ieova pe a talosaga mai nisi e faamatala i latou?

E faapefea ona faaalua o loo tutusa la tatou vaai ma le silafaga a Ieova i le ola?

E faapefea ona faaa'oa'o toea'ina i le faamasinotonu o le Atua pe a taulima faamasinoga o ni tagata fai mea sesē?

O aai o sulufa'iga i Isaraelu:

- Sa faigofie ona maua (1)
- Sa lelei auala (2)



Tulafono. (Roma 7:6) Peita'i, na faamauina e Ieova le Tulafono i lana Afioa le Tusi Paia mo i tatou. E finagalo o ia ina ia tatou iloa ma faatatau “mataupu matuā tāua” po o mataupu sili-sili o loo faavae mai i poloa'iga o le Tulafono, ae lē o le matuā taumafai e va'ili'ili mea ninii o le Tulafono. O se faata'ita'iga, o ā mataupu sili-sili e tatou te a'oa'oina mai i le faatulagaga o aai o sulufa'iga? Na tatou maua i le mataupu ua mavae lesonea e a'oa'oina mai i gaoioiga a le **tagata sulufa'i**. Ae e iai fo'i lesonea e tatou te a'oa'oina mai i aai o sulufa'iga e faatatau iā **Ieova**, ma auala e faaa'oa'o ai i ona uiga. O lea, i leinei mataupu o le a tatou taliina ai fesili nei e tolu: E faapefea i aai o sulufa'iga ona faaalua mai ai le alofa mutimutivale o Ieova? O le ā e tatou te a'oa'oina mai ai e faatatau i le silafaga a Ieova i le ola? E faapefea ona faaatagia mai ai lana faamasinoga lelei atoatoa? A o talanoaina nei manatu, mātau ni vala e mafai ona tatou faaa'oa'o ai i lo tatou Tamā i le lagi.—**Faitau le Efeso 5:1.**

“AAI E TALAFEAGAI MO OUTOU” —O SE FAAILOAGA O LE ALOFA MUTIMUTIVALE

4 Sa faigofie ona maua e se tagata sulufa'i aai o sulufa'iga e ono. Na poloa'ia e Ieova tagata Isaraelu ia ta'itolu aai i itu uma e lua o le Vaitafe o Ioritana. Aiseā? Ina ia faigofie ma vave

4, 5. (a) Na faapefea ona saunia aai o sulufa'iga ina ia faigofie ona maua, ma aiseā? (e) O le ā e tatou te a'oa'oina mai ai e faatatau iā Ieova?

ona maua e le tagata sulufa'i. (Nu. 35:11-14) Na fai fo'i ma toe faaleleia auala e aga'i atu i nei aai. (Teu. 19:3) E tusa ai ma tusitusiga a tagata Iutaia, na faatutū pou faailoilo i auala e faasino ai tagata sulufa'i i nei aai. Talu ai o lea na iai aai o sulufa'iga, e le'i mana'omia la i sē na fasioti tagata pa'ivalea ona sola atu i se nuu ese, lea na ono tofotofoina ai e tapua'i atu i ni atua sesē.

5 Se'i manatu i ai: O Ieova lava ia na poloa'ia le faasalaga oti mo lē na fasioti tagata faamoe-moeina. O la fo'i na tuuina atu i lē na fasioti tagata pa'ivalea le avanoa e maua ai Lona alofa mutimutivale ma lana puipuiga! Na tusi se faitofā o le Tusi Paia, “o poloa'iga uma na fesoota'i atu i aai o sulufa'iga, na manino ma faigofie. Ma'eu se auala alofa na faia e le Atua!” O Ieova e lē o se faamasino sauā e mana'o e faasala ana auauna. Nai lo o lea, o ia “e tele le alofa mutimutivale.”—Efe. 2:4.

6 I se tulaga tuufaafegagai, na mumusu le 'au Faresaio e faaalua le alofa mutimutivale. O se faata'ita'iga, e tusa ai ma tū masani a tagata Iutaia, na mumusu le 'au Faresaio e faamagalalo se tasi pe a sili atu i le faatolu ona ia faia le agasala lava e tasi. Na faaalialia e Iesu la latou vaiga i tagata fai mea sesē e ala i le ta'ua o se talafaatusa i se Faresaio na tatalo e faapea: “Le Atua e, ou te faafetai atu iā te oe ona ua ou lē pei o isi tagata, o ē e faia mea faapi'opi'o, o

6. Na faapefea ona tuufaafegagai le vaiga a le 'au Faresaio ma le alofa mutimutivale o le Atua?

ē e amiolētōnu, o ē e mulilulua, ua ou lē pei fo’i o lenei aolafoga.” Ae o lenā aolafoga na tatalo atu ma le lotomaulalo mo le alofa mutimutivale o le Atua. Aiseā na mumusu ai le ‘au Faresaio e faaalua le alofa mutimutivale? Ua ta’ua i le Tusi Paia na latou “vaai maualalo i isi.”—Luka 18: 9-14.

⁷ Ia tatou faaa’oa’o iā Ieova ae lē o le ‘au Faresaio. Ia faaalua le alofa mutimutivale. (**Faitau le Kolose 3:13.**) O se tasi o auala e faia ai faapea, o le faafaigofie lea mo isi ona talosaga mai ina ia o tatou faamagalō i latou. (Luka 17: 3, 4) Ia fesili ifo: ‘Po o vave ma faigofie ona ou faamagalō isi e tusa lava pe na latou faatigā mai i le tele o taimi? Po o o’u **naunau** e faatupu le filemu ma se isi na faia se mea ou te lē fiasia ai pe faatigā mai fo’i iā te a’u?’

⁸ O le faamagalō atu e tofotofoina ai lo tatou lotomaulalo. E le’i faaalua e le ‘au Faresaio le lotomaulalo ona na manatu e sili atu i latou i isi. Peita’i, i le avea ai ma Kerisiano, e tatau ona tatou lotomaulalo e “manatu ua sili isi” iā i tatou, ma ia faamagalō atu iā i latou. (Fili. 2:3) Po o le a e faaa’oa’o iā Ieova ma e manumalo ai i lenei tofotofoga o le lotomaulalo? Pe a e lotomaulalo, o le a faigofie i isi ona talosaga mai ina ia faamagalō i latou, ma e faigofie fo’i ona e faamagalō atu. Ia vave ona e faaalua le alofa mutimutivale ma ia aua ne’i vave ona tigā lou loto.—Fai. 7:8, 9.

IA FAATĀUA LE OLA MA E “LĒ NOFOSALA AI I LE FAAMASAATOTO”

⁹ O se tasi o fuafuaga autū o aai o sulufa’iga, o le puipuia lea o tagata Isaraelu mai i le nofosalā i le faamasaatoto. (Teu. 19:10) E tāua iā Ieova le ola ma e inosia e ia le fasioti tagata faamoemoeina po o “lima e sasaa le toto o ē e lē sala.” (Faata. 6:16, 17) O ia o le Atua e faamasinotonu ma paia, ma e na te lē tuufauina fo’i

7, 8. (a) E faapefea ona e faaa’oa’o iā Ieova pe a fai mai e se isi se mea sesē iā te oe? (e) Aiseā e avea ai le faamagalō atu o se tofotofoga o lo tatou lotomaulalo?

9. Na faapefea ona faamatilaila atu e Ieova i tagata Isaraelu le paia o le ola o le tagata?

le fasioti tagata pa’ivalea. E moni na faaalua le alofa mutimutivale i lē na fasioti tagata pa’ivalea. E ui i lea, na tatau ona ia faailoa atu lana solitulafono i toeaina. Pe a faamaonia e le’i fuafuaina lana gaoioiga na fai, na tatau ona nofo o ia i totonu o le aai o sulufa’iga se’ia malui le ositaulaga sili. O lona uiga, sa ono mana’omia ona nofo ai i inā i lona olaga atoa. O lenā faatula-gaga na faamatilaila atu ai i tagata Isaraelu uma le paia o le ola o le tagata. Ina ia faama-maluina Lē na foa’i maia le ola, na tatau ona latou ‘alofia so o se mea e lamatia ai ola o isi.

¹⁰ E le’i pei le ‘autusiupu ma le ‘au Faresaio o Ieova auā e latou te le’i faatāua le ola. I le ā le itū? Na fetalāi atu Iesu iā i latou: “Ua outou ave-esea le ki o le malamalama; auā tou te lē ulu atu lava i ai, ua outou taofia fo’i i latou o le a ulu atu i ai!” (Luka 11:52) Na tatau ona latou faa-matala atu uiga o le Afioga a le Atua ma fesoa-soani i tagata ina ia maua le ola e faavavau. Nai lo o lea, na latou tata’i ese tagata mai iā Iesu o le “Sui Sili o le ola,” ma ta’ita’i atu i se ala e i’u atu i le faumatiaga e faavavau. (Galu. 3:15) E le’i faatāua e le ‘autusiupu ma le ‘au Faresaio

10. E tusa ai ma le fetalaiga a Iesu, o le ā le auala e le’i faatāua ai e le ‘autusiupu ma le ‘au Faresaio ola o isi tagata?

Po o e faafaigofie mo isi ona talosaga mai ina ia faamagalō i latou? Ia e lotomaulalo ma faigofie ona talanoa mai isi iā te oe (Taga’i i le palakalafa e 4-8)



ola ma le lelei o isi tagata, ona o lo latou faamaualuluga ma le manatu faapito. Pagā lo latou saua ma le leai o se alofa mutimutivale!

11 E faapefea ona tatou 'alofia uiga o le 'autusiupu ma le 'au Faresaio ae faaa'oa'o iā Ieova? E tatau ona tatou faatāua ma faapelepele i le meaalofo o le ola. Na faia faapea e le aposetolo o Paulo e ala i le avatu o se molimau mae'ae'a. O le i'uga na mafai ona ia faapea mai: "Ua mamā a'u mai i le toto o tagata uma." (**Faitau le Galuega 20:26, 27.**) Peita'i, e le'i faapea na tala'i Paulo ina ia 'alofia ai ni faalogona nofosala pe manatu fo'i o se tiute e tau ina fai. Nai lo o lea, na uuna'ia o ia ona o le alofa i tagata ma na tāua o latou ola iā te ia. (1 Kori. 9: 19-23) E tatau fo'i ona tatou atia'e lenā vaaiga i le ola e pei o le silasila a Ieova. E 'finagalo Ieova ia oo uma lava tagata i le salamō.' (2 Pete. 3:9) Ae faapefea oe? O le atia'e o le alofa mutimutivale i lou loto o le a uuna'ia ai oe e faateleina lou maelega i le faiva, ma o le a faatumulia ai oe i le olioli.

12 E tatou te faaa'oa'o fo'i i le auala e silasila ai Ieova i le ola, e ala i le atia'e o se vaaiga sa'o i le tausia o le saogalemu. E tatau ona tatou tausia le saogalemu pe a ave le taavale ma faia ni galuega, e tusa po o ni galuega faufale, le toe faaleleia o fale, pe malaga atu fo'i i nofoaga mo le tapua'iga. E sili atu ona tāua tagata, le saogalemu, ma le soifua mālōlōina nai lo o le sefe o le taimi ma tupe. E tonu ma talafeagai mea **uma** e faia e lo tatou Atua, ma e tatou te fia faa'a'oa'o iā te ia. E tāua tele i toeaina ona mataalia mo le saogalemu o isi faapea fo'i i latou. (Faata. 22:3) Pe a faamanatu atu e se toeaina tulafono ma ta'iala mo le saogalemu, ia talia ana fautuaga. (Kala. 6:1) Ia vaai i le ola e pei ona silasila i ai Ieova, ma e "lē nofosala ai i le faamasaatoto."

11. (a) Na faapefea ona faaalua e le aposetolo o Paulo e tutusa lana vaaiga i le ola ma le silafaga a le Atua? (e) O le ā e fesoasoani iā i tatou e faa'a'oa'o ai i le maelega o Paulo i le faiva?

12. Aiseā e tāua ai i tagata o le Atua ona tausia le saogalemu?

'IA FAAMASINO E TUSA MA IA TULAFONO'

13 Na poloa'ia e Ieova toeaina i Isaraelu ina ia faaa'oa'o i ana tapulaa maualuluga o le faamasinotonu. Muamua, na mana'omia ona faamautinoa e toeaina po o le ā tonu lava le mea na tupu. Lua, na tatau ona latou iloilo lelei faanaunauga, uiga, ma amioga i le taimi ua mavae a lē na fasioti tagata, ina ia iloa ai pe e tatau ona faasafua atu i ai le alofa mutimutivale. Ina ia faaatagia atu le faamasinotonu o Ieova, na tatau i toeaina ona tilofa'ia pe na faia e le tagata sulufa'i lenei gaoioiga "ona o lona ita" ma na "lamalama" i le tagata na ia fasiotia. (**Faitau le Numera 35:20-24.**) Pe a iai ni molimau, e tatau ona to'alua pe sili atu ni molimau ina ia faamaonia ai se moliaga o le fasioti tagata faamoemoeina.—Nu. 35:30.

14 O lea, pe a uma ona faamautinoa e toeaina le mea tonu na tupu, sa tatau fo'i ona latou mafaufau e faatatau i le **tagata**, ae e lē na o lana gaoioiga na fai. Na latou mana'omia le tofā mamao, o le tomāi lea e iloa lelei atu ai mea e lē iloagofie, ma manino ai i le pogai o le mea na tupu. Ae sili atu i lea, na latou mana'omia le agaga paia o Ieova lea na mafai ai ona latou faaatagia atu lona tofā mamao, alofa mutimutivale, ma le faamasinotonu.—Eso. 34:6, 7.

15 I se faaeseesega, na ua'i atu le 'au Faresaio i le gaoioiga na faia e le tagata fai mea sesē nai lo o mea na i lona loto. Ina ua vāai le 'au Faresaio o auai Iesu i se 'aiga na faia i le fale o Mataio, na latou fesili atu i soo o Iesu: "Aiseā ua aai faatasi ai lo outou a'oa'o ma le 'auaolafoga ma ē e agasala?" Na tali mai Iesu: "E lē mana'omia e tagata malolosi se foma'i, ae na o ē mama'i. Ia outou ō ma a'oa'o'ina le uiga o nei upu, 'Ou te loto i le alofa mutimutivale, ae lē o le taulaga.' Auā ua ou sau e valaau i ē agasala ae lē o ē amiotonu." (Mata. 9:9-13) Po o lona uiga na manatu māmā Iesu i agasala matuiā? E leai.

13, 14. Na faapefea ona faaatagia atu e toeaina Isaraelu le faamasinotonu o Ieova?

15. Faamatala le eseese o le vaaiga a le 'au Faresaio ma le silasila a Iesu i tagata agasala.

O le mea moni, o le vala t̄aua o lana fe'au na aofia ai le talosaga ina ia salamō mai i agasala. (Mata. 4:17) E lē gata i lea, o le tofā mamao o Iesu na ia m̄tauina ai e iai nisi o "le 'auaolafoga ma ē e agasala" na manana'o e faia ni suiga. E latou te le'i ō i le fale o Mataio e tau ina aai, ae 'e to'atele i latou na amata fo'i ona mulimuli atu' iā Iesu. (Mare. 2:15) E faanoanoa ona e to'atele le 'au Faresaio e le'i v̄ai i tagata e pei ona silasila i ai Iesu. E le'i pei i latou o le Atua faamasinotonu ma alofa mutimutivale lea na manatu o loo latou tapua'i i ai. Na latou v̄ai i isi tagata o ni ē e agasala ma ta'usalaina i latou o ni tagata e lē aogā.

16 E tatau fo'i i toeaina i aso nei ona faamautinoa o loo latou faaa'oa'o iā Ieova, o lē e 'fiafia i le faamasinogatonu.' (Sala. 37:28) Muamua, e tatau ona latou "su'esu'e ma iloiloina m̄ae'a" ina ia faamautinoa pe na faia moni se agasala. Pe a faamaonia na faia le agasala, e tatau loa ona latou taulima le mataupu e tusa ai ma ta'iala o le Tusi Paia. (Teu. 13:12-14) Pe a latou iai i se komiti faafaamasinoga, e tatau ona latou iloilo lelei po ua salamō le Kerisiano na faia le agasala matuiā. E lē faigofie i taimi uma ona iloa po ua salamō se tagata pe leai. O le salamō e aofia ai manatu, faanaunauga, ma mea o loo i le loto o le tagata. (Faaa. 3:3) E tatau ona salamō se tagata na agasala ina ia maua ai le alofa mutimutivale.*

17 E lē mafai e toeaina ona v̄ai i loto o tagata e pei o Ieova ma Iesu. O lea, pe afai o oe o se toeaina, e faapefea ona e feagai ma lenei lu'i o le taumafai e iloa po ua salamō se tasi mai i lona loto? Muamua, ia tatalo mo le atamai ma le tofā mamao. (1 Tu. 3:9) Lua, ia tilofa'ia le Tusi Paia ma lomiga mai i le pologa faamaoni e fesoaso-

* Taga'i i le mataupu "Fesili Mai le 'Aufaitau" i *Le Olo-matamata* o Setema 15, 2006, itu. 30.

16. O le ā e taumafai se komiti faafaamasinoga e latou te iloa?

17, 18. E faapefea ona iloa e toeaina po ua salamō se tasi mai i lona loto? (Taga'i i le ata i luga a'e o le matua.)

ani e te iloa ai le eseese o le "faanoanoa o le lalolagi," mai i le "faanoanoa e tusa ai ma le finagalo o le Atua" po o le salamō moni. (2 Kori. 7:10, 11) Ia iloilo le auala o loo faamatala mai ai i le Tusi Paia le tagata ua salamō ma le tagata e lē salamō. O le ā le faamatalaga a le Tusi Paia e faatatau i o latou faalogona, uiga, ma gaoioiga?

18 Tolu, ia taumafai e vaai i le tulaga atoa o le tagata. Ia manatunatu i le talaaga o le tagata fai mea sesē, o uuna'iga o ana gaoioiga, ma mea e gata mai ai lona mafai. Na valoia i le Tusi Paia e faatatau iā Iesu, o le ulu o le faapotopotoga Kerisiano e faapea: "O le a lē faamasino e ia e tusa ma mea e vaai i ai ona mata, e lē a'oa'i atu fo'i e tusa ma mea e faalogo i ai ona taliga. E faamasino e ia ma le amiotonu ē ua faatauva, e a'oa'i atu fo'i e ia ma le amio sa'o ina ia maua aogā e tagata agamalu o i le lalolagi." (Isa. 11: 3, 4) Toeaina e, o outou o leoleo mamoe e fesoasoani iā Iesu, ma o le a fesoasoani mai o ia ina ia outou faia le faamasinoga e pei ona ia faia. (Mata. 18:18-20) Pe e tatou te lē lotofaafetai ai ona ua tatou maua ni toeaina alolofa o loo taumafai malolosi e faia faapea? E ma'eu lo tatou matuā talisapaia o a latou taumafaiga fitā, ina ia atia'e le alofa mutimutivale ma le faamasinotonu i a tatou faapotopotoga!

19 O le Tulafono a Mose na aofia ai le "faavae o le poto ma le upu moni" e faatatau iā Ieova ma ana tapulaa amiotonu. (Roma 2:20) O se faata'ita'iga, o aai o sulufa'iga ua a'oa'oina ai e toeaina le auala e latou te 'faamasino ai i le faamasinotonu,' ma a'oa'oina ai i tatou uma i le auala e faaalua ai le "alofa faamaoni ma alofa mutimutivale le tasi i le isi." (Saka. 7:9) E tatou te lē o toe ola i lalo o le Tulafono. Peita'i, e lē sui Ieova ma e t̄aua pea iā te ia le faamasinotonu ma le alofa mutimutivale. Ma'eu se faaeaga o le tapua'i atu i le Atua na faia i tatou i lona faatusa, o lē e mafai ona tatou faaa'oa'o i ona uiga ma sulufa'i atu i ai!

19. O le ā se lesona mai i aai o sulufa'iga ua e fua-fua e faatatau?

“E Faatamaoigaina le Tagata Limafoa’i”



UA LEVA ona avea taulaga o se vaega tāua o le tapua’iga moni. Sa ofo atu e tagata Isaraelu taulaga na faia i manu, ma ua mātaulia Kerisiano i taimi uma i lo latou faia o “taulaga o viiga.” Peita’i, e iai isi ituaiga taulaga e fialia i ai le finagalo o le Atua. (Epe. 13:15, 16) O nei taulaga e maua ai le olioli ma faamanuiaga, e pei ona faaalua i faaa’oga o loo mulimuli mai.

Sa matuā naunau Hana, o se tasi o auauna faamaoni anamua, ia maua sana tama tama. Peita’i sa lē fanau o ia. Sa tatalo o ia ma tautō iā Ieova pe afai o le a ia fanaua se tama tama, o le a “foa’i atu o ia iā Ieova i aso uma o lona ola.” (1 Samu. 1:10, 11) Mulimuli ane, na tō Hana ma ia fanauina ai se tama tama na faaigoa iā Samuelu. Ina ua te’a Samuelu ma le susu, sa ave o ia e Hana i le fale’ie paia e pei ona ia tautō ai. Sa faamanuia e Ieova Hana ona o lona uiga faataulaga. Sa faamanuiaina Hana i isi fanau e to’alima, ma na avea Samuelu o se perofeta ma tusitala o le Tusi Paia.—1 Samu. 2:21.

I le pei o Hana ma Samuelu, ua iai i Kerisiano i aso nei le faaeaga e faaaogā ai o latou ola i le auau-naga paia i Lē na faia i latou. Na folafola mai e Iesu o le a matuā tauia i tatou i so o se faataulaga e tatou te faia ina ia tapua’i atu ai iā Ieova.—Mare. 10:28-30.

I le ulua’i senituri, sa lauiloa se fafine Kerisiano e igoa iā Toreka i ana ‘galuega lelei ma le foa’i atu o meaalofa,’ po o faataulaga na ia faia ina ia fesoasoani ai i isi. Ae e faanoanoa ona na ‘ma’i o ia ma oti ai,’ ma na matuā faanoanoa ai le faapotopotoga atoa. Ina ua faalogo le ‘ausoo o loo iai i inā Peteru, sa latou talosaga atu iā te ia ina ia alu ane. Se’i faata lo latou fialia ina ua alu atu Peteru ma ia toe

faatūina mai Toreka! O le ulua’i toetū lea na faia e se aposetolo. (Gal. 9:36-41) E le’i galo i le Atua faataulaga na faia e Toreka. (Epe. 6:10) O loo faamauina i le Afioa a le Atua le limafoa’i o Toreka e avea o se faaa’oga lelei mo i tatou.

Sa faataatia fo’i e le aposetolo o Paulo se faaa’oga lelei o sē na foa’i atu ma le agalelei lona taimi ma ua’i atu i isi. Na tusi atu o ia i ona uso Kerisiano i Korinito e faapea: “Ua ou naunau tele e faaaogā mea uma ua iā te a’u, ma lo’u malosi atoa ona o o outou ola.” (2 Kori. 12:15) Sa a’oa’oina e Paulo mai i mea na tutupu iā te ia, e lagona e se tasi le faamalieina pe a ia faia ni faataulaga mo le lelei o isi. Ae o le itu e sili ona tāua, e maua ai le faamanuia ma le finagalo malie o Ieova.—Gal. 20:24, 35.

O lea la, e fialia le finagalo o Ieova pe a faaaogā lo tatou taimi ma le malosi ina ia faaauiluma ai mana’oga o le Malo, ma fesoasoani ai i uso ma tuafāfine. Ae pe e iai nisi auala e mafai ona tatou lagonaloina ai le galuega tala’i o le Malo? Ioe, e iai! E lē gata i a tatou galuega lelei, ae e mafai fo’i ona tatou faamamaluina le Atua e ala i a tatou meaalofa tauofo. Ua faaaogā na meaalofa ina ia faaoo atu ai le tala’iga i le lalolagi aoao, e aofia ai le lagonaloina o misionare ma isi auauna faapitoa faataimi atoa. O a tatou meaalofa tauofo fo’i o loo faagaioia ai le saunia ma le faaliliuina o lomiga ma vitiō, o galuega fesoasoani i taimi o mala faale-natura, faapea le fausiaina o Maota mo Sauniga fou. E tatou te mautinoa o le a “faatamaoigaina le tagata limafoa’i.” E lē gata i lea, ua tatou faamamaluina Ieova pe a faaaogā a tatou ‘oa ina ia auauna ai iā te ia.—Faata. 3:9; 11:25.

AUALA UA FILIFILI E NISI E FOA'I AI MEAALOFA MO LE GALUEGA I LE LALOLAGI AOO

E pei o aso o le aposetolo o Paulo, e “tuu ese” pe faaagaga e le to'atele se vaega tupe e lafo i pusa a faapotopotoga o loo faailogaina, “Galuega i le Lalolagi Aoo.” (1 Kori. 16:2) E lafo atu e faapotopotoga i masina ta'itasi nei tupe i le ofisa o le lālā o loo vaavaaia o latou atunuu. E mafai fo'i ona lafo sa'o lau foa'i, i se faalapotopotoga faaletulafono o loo faa-aogāina e Molimau a leova i lou atunuu. Ina ia iloa le faalapotopotoga faaletulafono autū o loo faa-aogāina e Molimau a leova i lou atunuu, faamolemole faafesoota'i le ofisa o le lālā o loo vaavaaia le atunuu. E mafai ona maua le tuatusi o le ofisa o le lālā i luga o le www.jw.org. O loo mulimuli mai foa'i e mafai ona e lafoina tuusa'o, e fua i tulaga i lou atunuu.

O FOA'I E LEAI NI TUUTUUGA

- Foa'i e ala i faletupe, o *debit card*, po o *credit card*. I nisi lālā e faa-aogā ai le upega tafa'ilagi o le jw.org po o se isi tuatusi aloa'ia.
- Foa'i tautupe, filifili, tautaliga, taulima, po o isi oloa tāua a le tagata lava ia. Ia faaafia ai ma se tusi e faailoa atu ai, o na mea ua foa'i atu e aunoa ma ni tuutuuga.

O FOA'I E IAI TUUTUUGA

- Foa'i tautupe ma le tuutuuga e toe faafo'i lenā foa'i i lē e ana le tupe, pe a ia talosagaina.
- Ia faaafia ai ma se tusi e faailoa atu ai e iai tuutuuga o le foa'i.

FUAFUAGA O FOA'I FAAMEALOFA

E lē gata i foa'i tautupe ma isi foa'i faamealofa, ae e iai isi auala e

faia ai foa'i mo le galuega o le Malo i le lalolagi aoo. O loo lisiina mai na auala i le pito i lalo. Po o le ā lava le auala e te filifili e faa-aogā, faamolemole faafesoota'i muamua le ofisa o le lālā o loo vaavaaia lo outou atunuu, ina ia iloa ai auala o loo faa-aogāina e lou atunuu. Talu ai e eseese tuutuuga faaletulafono ma tulafono o lafoga a atunuu, e tāua ai ona sa'ili le fesoasoani a ni lōia ma tagata faufautua e faatatau i lafoga, a o le'i filifili po o lē fea le auala sili e faia ai lau foa'i.

Inisia ma Tupe Maua pe a Litaea:

O le inisia o le ola o se tasi, o le teugātupe na faaagaga mo le taimi e litaea ai, ma tupe e maua pe a litaea po o le penisione, o le a lotomalie se tasi e foa'i mo le faalapotopotoga o loo faa-aogāina e Molimau a leova.

Teugātupe i le Faletupe:

O teugātupe i le faletupe e mafai ona totogi atu pe a maluu, i se faalapotopotoga o loo faa-aogāina e Molimau a leova, ma ia faia e tusa ma aiāiga a faletupe o le atunuu.

Tupe Faafaigaluega (Stocks) ma Pepa Faamaonia mo Tupe (Bonds):

O nei mea e mafai ona foa'i faamealofa tuusa'o atu i se faalapotopotoga o loo faa-aogāina e Molimau a leova po o le tuu faamavaega e totogi atu pe a maluu lē o faia le foa'i.

Fanua ma Fale: E mafai ona foa'i tuusa'o ou fanua ma fale, i se faalapotopotoga o loo faa-aogā e Molimau a leova, pe tuu e nofo ai pea lē e ana le fale se'ia oo ina maluu, ona faato'ā maua lea e le lālā.

Uili ma Mavaega: E mafai ona foa'i atu meatotino po o se vaega tupe i se faalapotopotoga o loo faa-aogāina e Molimau a leova, e ala i se uili ua faia e tusa ai ma le tulafono. Pe mauaina fo'i e lenei faalapotopotoga le tau i se teugātupe ua tuu faamavaega. O le faia faapea, e mafai ona faaititia ai lafoga e totogi.

E pei ona faailoa mai i le faaupuga “fuafuaga o foa'i faamealofa,” o nei foa'i e mana'omia ona fuafua lelei e lē e ana le foa'i. Ina ia fesoasoani i ē o loo fia faia ni mea-alofa tauofo i le galuega a Molimau a leova i le lalolagi aoo, ua saunia ai se polosiua i le faa-Peretania ma le faa-Sepania e ta'ua o le *Charitable Planning to Benefit Kingdom Service Worldwide*. Ua saunia i le polosiua faamatalaga i auala eseese e faia ai foa'i faamealofa i le taimi lenei, ma pe a maluu lē e ana le foa'i. Atonu e lē o faamatalaga uma i le polosiua e aogā i lou tulaga, ona o tulafono o lafoga po o nisi o tulafono i le atunuu o loo e nofo ai. O nei auala ua mafai ai e le to'atele ona lagolagoina fuafuaga a Molimau a leova i le lalolagi aoo, ma maua ai fo'i le fesoasoani i le faaititia o lafoga e totogi. Atonu e mafai ona e talosagaina se kopi o lenei polosiua mai le failautusi o lau faapotopotoga, pe afai e maua i le atunuu o loo e nofo ai.

Mo nisi faamatalaga, oomi le vaega “Make a Donation to Our Worldwide Work” o loo i le pito i lalo o so o se itulau o le jw.org/sm, pe faafesoota'i le ofisa o le lālā.



Ia Teena Mafaufauga o le Lalolagi

“Ia faaeteete: ina ne’i maileia outou e se tasi i filosofia ma manatu taufaasesē e lē aogā . . . a le lalolagi.”—KOLO. 2:8.

PESE: 38, 31

O LE Ā LAU TALĪ

O le ā le fautuaga alofa a le aposetolo o Paulo e faatatau i mafaufauga o le lalolagi?

O le ā se faaa’oa’oga o mafaufauga o le lalolagi, ma e faapefea ona tatou teena?

Ua faapefea ona fesoasoani lenei mataupu iā te oe?

E FOLIGA mai na tusia e le aposetolo o Paulo lana tusi i Kerisiano i Kolose, a o lata ina faai’u le taimi muamua na taofia ai o ia i Roma i le pe tusa o le 60-61 T.A. Na ia faapea atu i na Kerisiano e tāua ona latou maua le “malamalama faaleagaga.” (Kolo. 1:9) Na faapea atili atu Paulo: “Ua ou fai atu lenei mea, ina ne’i faatosina ese outou e se tasi i ana faamatalaga taufaasesē. Ia faaeteete: ina ne’i maileia outou e se tasi i filosofia ma manatu taufaasesē e lē aogā e tusa ma tū masani a tagata, e tusa ma mataupu faavae a le lalolagi, ae e lē tusa ma a’oa’oga a Keriso.” (Kolo. 2:4, 8) Na sosoo ai ma lona faamatala atu o māfuaaga na sesē ai nisi o manatu taatele, ma le pogai e fiafia ai tagata lē lelei atoatoa i mafaufauga o le lalolagi. O se faaa’oa’oga, o nisi o na manatu na faapogaia ai ni faaloga fiafiasili i isi, ma manatu ai e latou te atamamai atu nai lo o isi. O le fuafuaga o lenei tusi, ina ia fesoasoani i uso ia teena mafaufauga o le lalolagi ma gaoioiga sesē.—Kolo. 2:16, 17, 23.

² O mafaufauga o le lalolagi e uuna’ia ai se tasi ina ia lē amana’ia pe manatu māmā i ta’iala a Ieova, ma e faasolosolo ona faavaivaia ai lo tatou faatuatua. O i tatou uma lava e vāai, faalogo, ma faitau i mafaufauga o le lalolagi e ala mai i televise, Initaneti, galuega, po o a’oga. O le a iloiloina i lenei mataupu mea e mafai ona tatou

1. O le ā le fautuaga na tusi atu e le aposetolo o Paulo i Kerisiano i Kolose? (Taga’i i le ata i luga a’e o le matua.)
2. Aiseā o le a tatou iloiloina ai ni faaa’oa’oga o mafaufauga o le lalolagi?

faia ina ia teena ai na mafaufauga e faasesē-ina ai o tatou mafaufau. O le a tatou talanoa-ina ni faaa'oa'oga se lima o mafaufauga o le lalolagi, ma auala e tatou te teena ai.

PE E MANA'OMIA ONA TATOU TALITONU I LE ATUA?

³ “E mafai lava ona avea a’u ma tagata lelei e aunoa ma le talitonu i le Atua.” I le tele o atunuu, e masani ona faapea mai tagata e latou te lē talitonu i le Atua ma e lē ō i ni lotu. Atonu e latou te le’i iloiloina lelei le manatu e faapea o loo soifua le Atua, ae e latou te fiasia i le manatu e pule lava i latou i le mea e fai. (Faitau le Salamo 10:4.) E manatu isi o i latou o ni tagata e atamamai pe a faapea mai, “E mafai lava ona avea a’u ma tagata lelei e aunoa ma le talitonu i le Atua.”

⁴ Pe e sa’o manatu o tagata ia e faapea mai e leai Sē na foafoaina mea uma? E faigofie ona fenuminia’i se tasi pe a sa’ili atu i le faasaienisi ina ia iloa ai pe na faapefea ona amata le ola. Peita’i, e faigofie lava le tali. Pe afai e tatau ona iai se tufuga e na te fausia se fale, e sili atu la ona mana’omia se tasi e na te foafoaina meafaiola! O le mea moni, e sili atu ona lavelave sela i tino o meafaiola nai lo o se fale, auā e lē mafai e se fale ona fanafanau e pei o sela ola. E mafai e nei sela ona teu faamatalaga ma toe faia kopi o i latou lava ina ia toe maua mai ai o latou ituaiga. O ai na foafoaina nei sela? O le tali lenei a le Tusi Paia: “E tofu lava le fale ma le tagata na ia faia, a o lē na faia mea uma o le Atua lea.”—Epe. 3:4.

⁵ E faapefea ona tatou tali atu i le manatu e faapea, e mafai lava ona tatou iloa le mea e lelei e aunoa ma le talitonu i le Atua? Ua ta’ua

3. O le ā le manatu o loo fiasia ai le to’atele o tagata, ma aiseā?

4. E faapefea ona tatou fefulfulisa’i ma se tasi e faapea mai e leai Sē na foafoaina mea uma?

5. E faapefea ona tatou tali atu i le manatu e faapea, e mafai ona tatou iloa le mea e lelei e aunoa ma le talitonu i le Atua?

i le Afioga a le Atua e oo lava i tagata e lē talitonu i le Atua, e ono iai fo’i a latou tapulaa tau amio. (Roma 2:14, 15) O se faaa’oa’oga, atonu e latou te faaaloalo ma alolofa i o latou mātua. Peita’i, faamata e lelei ni tapulaa a se tasi e na te lē amana’ia Lē na foafoaina mea, ma o Lē e faatulagaina tapulaa mo le mea sa’o ma le mea sesē? (Isa. 33:22) O le to’atele o ē e atamamai ua latou ta’utino mai e mana’omia e tagata le fesoasoani a le Atua, ona o tulaga leaga o loo tutupu i le lalolagi. (Faitau le Ieremia 10:23.) O lea, e lē tatau ona tatou manatu e mafai e le tagata ona iloa le mea lelei, e aunoa ma le talitonu i le Atua ma usita’i i Ana tapulaa.—Sala. 146:3.

PE E MANA'OMIA ONA TATOU AUAI I SE LOTU?

⁶ “E mafai lava ona e fiasia e aunoa ma lou auai i se lotu.” E to’atele tagata e fiasia i lenei manatu, ona e latou te vāai i lotu o se mea ua pasiā ma lē toe aogā. Ua lē toe tapua’i fo’i tagata i le Atua ona o loo a’oa’o i le tele o lotu le a’oa’oga i le afi i seoli, le aoina o sefulua’i, po o le lagolagoina o faiga faapolotiki. E lētioa a faatupula’ia le aofa’i o tagata e manatu e mafai lava ona latou fiasia e aunoa ma le auai i se lotu. E latou te ono faapea mai, “Ou te fiasia e talanoa i le Tusi Paia, ae ou te lē fia alu i se lotu.”

⁷ Pe e moni e mafai lava ona fiasia se tasi e aunoa ma le auai i se lotu? E moni e mafai lava ona fiasia se tasi e aunoa ma lotu **sesē**, ae e lē mafai ona fiasia moni se tasi e aunoa ma se faiā lelei ma Ieova “le Atua fiasia.” (1 Timo. 1:11) O mea uma e faia e le Atua e mo le lelei o isi. E fiasia ana auauna ona e latou te taula’i atu i le fesoasoani i isi. (Gal. 20:35) O se faaa’oa’oga, se’i mafaufau i le auala e faatupu ai e le tapua’iga moni le fiasia i le aiga. E a’oa’o e le tapua’iga

6. O le ā le manatu o le to’atele e faatatau i lotu?

7. E faapefea ona faatupu e le tapua’iga moni le fiasia?

moni i tatou ia faaaloalo ma āva i a tatou paaga faaipoipo, ia manatu i le tautoga o le faaipoipoga o se mea e paia, ia faamamao mai i le mulilua, ia tausia a’e se fanau e faaaloalo i isi, ma ia faaalua le alofa moni. O le i’uga, o le tapua’iga moni ua autasia ai tagata i faapotopotoga fiafia ma se ‘auuso fiafia i le lalolagi aoao.—**Faitau le Isaia 65:13, 14.**

⁸ O le ā so tatou manatu i mafauauga o le lalolagi e faapea, e mafai lava ona fiafia se tasi e aunoa ma le auauna i le Atua? Ia mafau-fau i le fesili lenei, O le ā le ki i le mauaina o le fiafia moni? E faafiafiaina nisi ona o a latou galuega, taaloga, po o isi mea. E olioli nisi ona o le tausia o se aiga, po o ni faia māfana ma uō. O mea uma na e maua ai le fiafia, peita’i e iai se isi fuafuaga o le olaga e sili atu ona tūa e tatou te maua ai le fiafiaga tumau. E ese i tatou mai i manu, ona e mafai ona tatou a’oa’oina le pototo e faatatau i Lē na faia i tatou, ma auauna iā te ia ma le faamaoni. O le auala lenā na foafoaina ai i tatou ma e maua ai le fiafia. (**Faitau le Mataio 5:3.**) O se faaa’oa’oga, e faafiafiaina tagata tapua’i moni pe a faapotopoto faatasi e tapua’i iā Ieova, ma maua ai le tele o faalaeiauga. (Sala. 133:1) E latou te olioli fo’i i se ‘auuso fealofani, ni olaga mamā, ma se faamoemoe fiafia.

PE E TATOU TE MANA’OMIA NI TAPULAA TAU AMIO?

⁹ “Aiseā e faasā ai fua le faia o feusua’iga i le va o ni tagata e lē faaipoipo?” E ono faapea mai tagata: “O le mea tūa ia tatou fiafia. Aiseā e faasā ai fua le faia o feusua’iga i le va o ni tagata e lē faaipoipo?” E sesē le manatu e faapea e tatau ona talia e Kerisiano amioga lē mamā tau feusua’iga. Aiseā? Talu ai e faasā i le Afioa a le Atua le

8. E faapefea ona tatou faaaogā le Mataio 5:3 ina ia fefulifulisa’i ai ma isi i le fesili, O le ā le ki i le mauaina o le fiafia moni?

9. (a) O le ā le manatu ua taatele i le lalolagi e faatatau i feusua’iga? (e) Aiseā e faasā ai i le Tusi Paia le faia o feusua’iga i le va o ni tagata e lē faaipoipo?

faitaaga.* (**Faitau le 1 Tesalonia 4:3-8.**) E iai le aiā tatau a Ieova e faia ai tulafono mo i tatou, ona o ia na faia i tatou. E faataga e le tulafono a le Atua le faia o feusua’iga i le va o se tane ma se fafine ua uma ona faaipoipo, ma o le faatulagaga lenā o le faaipoipoga. Ua saunia mai e le Atua tulafono ona e alofa iā i tatou, ma e mo lo tatou lelei. O aiga e usiusta’i i na tulafono e latou te olioli i ni mafutaga alofa, faaaloalo, ma saogalemu. E lē talia e le Atua i latou e iloa ana tulafono ae e lē usiusta’i i ai.—Epe. 13:4.

¹⁰ Ua a’oa’oina i tatou i le Afioa a le Atua i auala e matuā faamamao ese ai mai i feusua’iga lē mamā. O se auala tūa e faia ai faapea, o le pulea lea o mea e tatou te vaavaai i ai. Na fetalai Iesu: “Ai se tasi e vaavaai pea i se fafine ma mana’ona’o i ai, ua uma ona mulilua ma ia i lona loto. O lenei, afai e te tausui ona o lou mata taumatau, ia sali ese ma lafoa’i.” (Mata. 5:28, 29) O lea, e tatau i se Kerisiano ona ‘alofia le matamata i ata matagā tau feusua’iga pe faalogologo i pese lē mamā. Na tusi le aposetolo o Paulo: “Ia fasiotia tu’inauga i o outou itutino, o le faitaaga.” (Kolo. 3:5) E lē gata i lea, e tatau ona pulea mea e tatou te mafaua ma talanoa ai.—Efe. 5:3-5.

PE E TATAU ONA TATOU TULILOAINA SE GALUEGA LELEI?

¹¹ “E maua le fiafia pe a tatou tuliloaina se galuega lelei.” E faalaeiau e le to’atele o

* O le to’atele o tagata e lē o iloa o faamatalaga o loo ta’ua i le loane 7:53–8:11 i nisi o Tusi Paia, o ni manatu faaopoopo ae e le’i aofia ai i ulua’i tusitusiga paia. E faavae i lenā mau, ua faapea mai nisi e na o le tagata e leai se agasala e mafai ona ia faamasinoina sē ua mulilua. Peita’i, e manino le tulafono a le Atua i le nuu o Isaraelu e faapea: “Afai e maua se tamāloa o momoe ma se avā a le tasi tamāloa, ia fasiotia i la’ua uma.”—Teu. 22:22.

10. E faapefea i se Kerisiano ona matuā faamao ese mai i feusua’iga lē mamā?

11. Aiseā e ono tosina atu ai se Kerisiano i le tuliloaina o se galuega lelei?



E tumau ona fiasia se tasi pe a fesoasoani i isi ina ia a'oa'o le poto e faatatau i le Atua (Taga'i i le palakalafa e 12, 13)

tagata i tatou ina ia tuliloa ni galuega lelei. O na galuega e ono maua ai se tulaga aloa'ia, pule, ma le tamaoaiga. Talu ai o le to'atele o tagata e taula'i atu o latou olaga i le tuliloaina o ni galuega lelei, e ono mafai fo'i la ona aafia ai se Kerisiano i na mafaufauga.

¹² Pe e moni o le a tumau ona fiasia se tasi pe a taulau manuia i se galuega lelei, lea e maua ai le pule ma se tulaga taualoa? E leai. Ia manatua, na maileia Satani i le tu'inauga o le fia pule ma viivii e isi. Ae e lē o fiasia Satani, ma e lotoa tele o ia. (Mata. 4: 8, 9; Faaa. 12:12) I se faaeseesega, e tumau ona fiasia se tasi pe a fesoasoani i isi ina ia a'oa'o le poto e faatatau i le Atua ma le faamoemoe o le ola e faavavau. E lē tumau le fiasia o se tagata i galuega a le lalolagi. E lē gata i lea, o galuega a le lalolagi e tumu i le uiga faatautavā. E uuna'ia ai fo'i le uiga fiasili ma le lotoleaga, ae o le i'uga e na o le “ai a le matagi.”—Fai. 4:4.

¹³ E moni e mana'omia ona tatou faigalu-

12. Pe e fiasia moni se tasi pe a taulau manuia i se galuega lelei?

13. (a) O le ā se manatu e tatau ona iā i tatou e faatatau i galuega totogi? (e) E tusa ai o le tusi a Paulo i Kerisiano i Tesalonia, aiseā na matuā fiasia ai o ia?

ega ina ia maua tupe e tasi ai o tatou ola, ma e lē leaga le filifilia o galuega e tatou te fiasia i ai. E ui i lea, e lē tatau ona taula'i atu o tatou olaga i galuega totogi. Na fetalai Iesu: “E lē mafai ona pologa se tasi i ni matai se to'alua, auā e 'ino'ino o ia i le tasi ae alofa atu i le isi, pe e pipii atu i le tasi ae manatu faatauvaa i le isi. E lē mafai ona e pologa i le Atua atoa ma 'Oa.” (Mata. 6:24) E tatou te maua le fiasia moni pe a faamuamua le auu-naga iā Ieova ma a'oa'o isi i lana Afioaga. O le ituaiga fiasia lenā na tofo i ai le aposetolo o Paulo. Na tuliloa muamua e Paulo se galuega lelei i le faiga o mea faa-Iutaia. Ae mulumuli ane na ia maua le fiasia moni ina ua auai i le galuega o le faia o isi ma soo, ma vaaitino i le talilelei ane o tagata i le fe'au mai i le Atua ma suia ai o latou olaga. **(Faitau le 1 Tesalonia 2:13, 19, 20.)** Ua na o le pau lenā o le galuega e maua ai le fiasia moni.

PE E MAFAI ONA TATOU FO'IA FAAFITAU LI O TAGATA?

¹⁴ “E mafai ona fo'ia e tagata o latou lava faafitauli.” Atonu e fiasia le to'atele o

14. Aiseā e ono fiasia ai nisi i le manatu e faapea, e mafai ona fo'ia e tagata o latou lava faafitauli?

tagata i lenei manatu o le lalolagi. Aiseā? Pe afai e moni lenei manatu, o lona uiga la e lē mana’omia e tagata le ta’ita’iga a le Atua, ma e pule lava le tagata i le mea e fai. O se isi māfuaaga e fialia ai isi i lenei manatu, ona e tusa ai ma nisi su’esu’ega, ua faaitiitia taua, solitulafono, faama’i, ma le tulaga mativa. Ua ta’ua i se lipoti: “O le māfuaaga ua faasolo ai ina faaleleia tulaga o tagata, ona ua filifili tagata e faaleleia le tulaga o lalolagi.” Pe e faamaonia mai i lenā lipoti ua mafai e tagata ona fo’ia faafitauli ua autausagā o latou puapugatia ai? Ina ia tali lenei fesili, se’i o tatou iloilo nei faafitauli.

¹⁵ **Taua:** E silia i le 60 miliona soifua na maumau i taua e lua a le lalolagi. Talu mai le Taua Lona Lua a le Lalolagi, ua lē mafai e tagata ona taofia faigātaua. E oo ane i le 2015, ua siitia i le pe tusa ma le 65 miliona tagata na ō ese faamalosī mai i o latou aiga ona o taua po o sauāga. E pe tusa ma le 12.4 miliona tagata na ō ese faamalosī mai i o latou aiga i le 2015. **Solitulafono:** E ui lava ua faaitiitia isi solitulafono i nisi o atunuu, peita’i ua matuā faatupula’ia isi ituiga solitulafono e pei o solitulafono i luga o le Initaneti, o sauāga i aiga, ma faiga faatupu faalavelave. E lē gata i lea, e manatu le to’atele ua sasao faafai faiga pi’opi’o i le lalolagi aoao. Ua lē mafai e tagata ona tafiesea solitulafono. **Faama’i:** E iai faama’i ua mafai ona togafitia. Peita’i, e tusa ai ma se lipoti i le 2013, e to’a iva miliona tagata i lalo ifo o le ta’i 60 tausaga ua maliliu i tausaga ta’itasi, ona o faama’i o le fatu, o le pē o le tino, kanesa, faaleagaina o māmā, ma le ma’i suka. **Mativa:** E tusa ai ma le lipoti a le Faletupe Autū a le Lalolagi, ua faatupula’ia le aofo’i o tagata e matuā matitiva i Aferika, mai i le 280 miliona i le 1990 i le 330 miliona i le 2012.

15. O ā faamatalaga e faamaonia ai le tulaga mata’utia o faafitauli o tagata?

¹⁶ O loo pulea e ta’ita’i manatu faapito faiga faapisinisi ma faiga faapolotiki i aso nei. E manino mai la, e lē mafai e nei ta’ita’i ona aveesea taua, solitulafono, faama’i, ma le tulaga mativa. E na o le Malo o le Atua e mafai ona aveesea nei faafitauli. Se’i manatu i mea o le a faia e Ieova mo tagata. **Taua:** O le a aveesea e le Malo o le Atua mea uma e faapogaia ai faigātaua, e pei o le manatu faapito, faiga pi’opi’o, lotonuu, tapua’iga sesē, atoa fo’i ma Satani. (Sala. 46:8, 9) **Solitulafono:** Ua a’oa’oina e le Malo o le Atua le faitau miliona o tagata i aso nei ina ia fealofani ma feoeoea’i, o se mea e lē mafai ona faia e se malo faaletagata. (Isa. 11:9) **Faama’i:** O le a faamanuia e Ieova ona tagata ma latou maua ai le soifua mālōlōina lelei atoatoa. (Isa. 35:5, 6) **Mativa:** O le a tafiesea e Ieova le tulaga mativa, ma faatamaoiga ona tagata i le itu faaleagaga ma le faaletino, o se mea e sili atu ona tāua nai lo o tupe.—Sala. 72:12, 13.

“IA OUTOU ILOA LE AUALA E TALI ATU AI”

¹⁷ Pe afai e te faalogo i se manatu o le lalolagi e tofotofoina ai lou faatuatua, ia su’esu’e po o ā fā a le Afioaga a le Atua e faatatau i lenā manatu, ma talanoa atu i se Kerisiano ta’u-matuaina. Ia tomānatu pe aiseā e fialia ai tagata i lenā manatu, o ā māfuaaga e sesē ai, ma pe e faapefea ona e teena. Ioe, e mafai ona tatou puipua i tatou lava mai i mafau-fauga o le lalolagi, e ala i le mulimuli i le apoapoa’iga a Paulo i le faapotopotoga i Kolose: “Ia outou savavali pea ma le atamai e faatatau i ē o i tua . . . Ia outou iloa le auala e tali atu ai i tagata ta’ito’atasi.”—Kolo. 4: 5, 6.

16. (a) Aiseā e na o le Malo ai o le Atua e mafai ona fo’ia faafitauli o tagata? (e) O ā faamanuiaga o le Malo o loo folafola mai e Isaia ma le faisalamo?

17. E faapefea ona e teena mafau-fauga o le lalolagi?



Aua Ne'i Aveesea e se Mea lo Outou Taii

“Ia aua ne'i aveesea mai iā te outou le taii e se tasi.”—KOLO. 2:18.

I LE pei o le aposetolo o Paulo, ua iai i Kerisiano faauuina i aso nei le faamoemoe tautele o le mauaina lea ‘o le taii o le valaau faalelagi mai i le Atua.’ (Fili. 3:14) O loo latou tulimata’ia le auuna faatasi ma Iesu Keriso i lona Malo i le lagi ma toe faafo’isia tagata i le ola lelei atoatoa. (Faaa. 20:6) Ma’eu se sini matagofie ua valaaulia i latou e le Atua ina ia tuliloa! Ae e ese fo’i le faamoemoe o isi mamoe. O loo latou tulimata’ia le taii o le ola e faavavau i luga o le lalolagi. Ma’eu se faamoemoe matagofie! —2 Pete. 3:13.

² Ina ia fesoasoani i ona uso Kerisiano faauuina ia tumau faamaoni ma maua le taii, na faalaeiau e Paulo i latou e faapea: “Ia taula’i o outou mafaufau i mea faalelagi.” (Kolo. 3:2) Sa tatau ona latou manatua i taimi uma le faamoemoe tautele o le mauaina lea o lo latou tofi i le lagi. (Kolo. 1:4, 5) Ioe, o le mafaufau i faamanuiaga ua saunia mai e Ieova mo ona tagata, e fesoasoani

1, 2. (a) O le ā le taii o loo tulimata’i e auuna a le Atua? (e) O le ā e fesoasoani iā i tatou ina ia taula’i atu ai pea i le taii? (Taga’i i le ata i luga a’e o le matua.)

PESE: 122, 139

O LE Ā LAU TALII?

E faapefea ona puipuia i tatou mai i faatosinaga o tu’inauga lē mama?

E faapefea i le alofa ma le agalelei ona puipuia ai i tatou mai i le aveesea o lo tatou taii?

E mafai faapefea ona tatou maua faatasi o se aiga le taii?

i auaua uma a le Atua ina ia taula'i atu ai pea i le tau'i e tusa po o le lagi po o le lalolagi.—1 Kori. 9:24.

³ Sa lapata'ia fo'i e Paulo Kerisiano e faatatau i mea e mafai ona aveesea ai lo latou tau'i. O se faaa'oa'oga, na tusi atu o ia i le faapotopotoga i Kolose e faatatau i Kerisiano pepelo na taumafai e faafiafia le Atua, e ala i le tausia o le Tulafono nai lo o le faatuatua iā Keriso. (Kolo. 2:16-18) Sa talanoa fo'i Paulo e faatatau i mea e mafai ona aveesea ai lo tatou tau'i i aso nei. O se faaa'oa'oga, na ia faamatala auala e teena ai tu'inauga lē mamā, fo'ia ai faafitauli i le va ma isi Kerisiano, faapea faafitauli i le aiga. O loo aogā iā i tatou i aso nei ana fautuaga e faatatau i nei mataupu. O lea, se'i o tatou iloilo nisi o lapata'iga alofa a Paulo o loo i lana tusi i Kerisiano i Kolose.

IA FASIOTIA TU'INANAUGA LĒ MAMĀ

⁴ Ina ua uma ona faamanatu atu e Paulo i ona uso lo latou faamoemoe matagofie, ona ia tusi lea e faapea: “O le mea lea, ia fasiotia tu'inauga i o outou itutino, o le faitaga, o amioga lē mamā, le tu'inanau i feusua'iga, o tu'inauga leaga ma le mana'otele.” (Kolo. 3:5) E matuā malolosi tu'inauga lē mamā ma e mafai ona aveesea ai a tatou 'oa faaleagaga. Ina ua toe fo'i mai i le faapotopotoga se uso na lolo atu i tu'inauga lē mamā, na faapea mai o ia: “Na matuā malolosi o'u tu'inauga lē mamā, ma na i'u lava ina ou tosina i ai ma ou faia.”

⁵ E tāua ona tatou faaeteete aemaise lava pe a tatou iai i tulaga e ono faasoosoina ai ia solia tapulaa tau amio a Ieova. O se faaa'oa'oga, o se faiga atamai i se alii ma se tama'ita'i o loo uō ona faataatitia ni tapulaa

3. O ā mea na lapata'ia ai e Paulo Kerisiano?

4. Aiseā e mafai ai ona aveesea lo tatou tau'i ona o tu'inauga lē mamā?

5. E mafai faapefea ona puipuia i tatou lava mai i tulaga e faasoosoina ai?

mo i la'ua mai i le amataga, i tulaga e pei o le fepa'ia'i, feasogi, po o le iai na o i la'ua i se nofoaga. (Faata. 22:3) E ono tula'i mai fo'i ni tulaga e faasoosoina ai pe a toesea se Kerisiano mai i le aiga ae malaga mo ni mataupu faapisinisi, pe galulue faatasi fo'i ma se tasi o le isi itupā. (Faata. 2:10-12, 16) Pe a lua faigaluega faatasi ma se tasi o le isi itupā, ia faailoa atu o oe o se Molimau a Ieova, ia gaoioi i se auala faaloalo, ma ia manatua e iai i'uga leaga o le faatafai solo. E ono matuā faasoosoina fo'i i tatou pe a tatou lotomafatia ma lotovaivai. O taimi faapena e tatou te ono mana'omia ai se tagata e naunau mai iā i tatou. Atonu o le malolosi o na faaloga e tatou te fiafia ai e talia so o se tasi o le isi itupā e naunau mai. Pe afai e tupu se tulaga faapena iā te oe, ia sa'ili atu iā Ieova ma ona tagata mo se fe-sooani, ina ia aua ne'i e faatagaina na mea e aveesea ai lou tau'i.—**Faitau le Salamo 34:18; Faataoto 13:20.**

⁶ Ina ia fasiotia tu'inauga lē mamā, e mana'omia ona tatou teena faafiafiaga lē mamā. O le tele o faafiafiaga i aso nei e talitutusa ma tulaga na tutupu i Sotoma ma Komoro i aso anamua. (Luta 7) Ua atagia mai i faafiafiaga a i latou e faia faafiafiaga, le manatu e faapea o feusua'iga lē mamā o se vala masani o le olaga, ma e leai ni i'uga leaga e i'u i ai. E lē tatau ona tatou faatamala ai ma talia so o se faafiafiaga e ofo mai e lenei lalolagi. E ao ona tatou filifilia faafiafiaga o le a lē taofia ai i tatou mai i le taula'i atu pea i le tau'i o le ola.—Faata. 4:23.

“IA OOFU OUTOU” I LE ALOFA MA LE AGALELEI

⁷ E tatou te ioe uma lava o se faamanuiaga le ave'a ai ma vaega o le faapotopotoga

6. O le ā e tatau ona tatou manatua pe a filifili a tatou faafiafiaga?

7. O ā faafitauli e ono feagai ma i tatou i totonu o le faapotopotoga Kerisiano?

Kerisiano. E tatou te su'esu'eina le Afioga a le Atua i a tatou sauniga, ma e tatou te alolofa ma lagolagosua ma le agalelei le tasi i le isi. O vala nei e fesoasoani iā i tatou e taula'i atu ai pea i le tau'i. E ui i lea, e iai taimi e alia'e mai ai ni tulaga e lē femalamalamaa'i ai, ma e ono faapogaia ai feeseesea'iga i le va o sui o le faapotopotoga. Pe afai e tatou te lē fo'ia na faaitauli, e faigofie ona i'u atu ai i faalagona ita.—**Faitau le 1 Peteru 3:8, 9.**

⁸ O faalagona ita e mafai ona aveesea ai lo tatou tau'i. E faapefea la ona tatou 'alofia lenei tulaga? Na fautua atu Paulo i Kerisiano i Kolose e faapea: "O outou o ē ua filifilia e le Atua, o ē ua paia ma alofagia, ia oofu outou i le alofa mutimutivale, le agalelei, lotomaulalo, agamalu ma le faapalepale. Ia faaaauu ona onosa'i le tasi i le isi, ma ia feaamagaloa'i ma le lotoatoa pe afai ua faia e se tasi se mea e tigā ai le isi. E pei ona finalo malie Ieova e faamagalalo iā te outou, ia faapea fo'i ona outou faia. Peita'i, e iai fo'i se isi mea e mana'omia, ia oofu outou i le alofa, auā o le fusi lea e atoatoa ona autasi ai."—Kolo. 3:12-14.

⁹ E mafai ona fesoasoani le alofa ma le agalelei ina ia tatou lotofaamagalalo ai i isi. O se faata'ita'iga, pe afai e tatou te tigā i faamatalaga po o gaoioiga a se isi Kerisiano, ia taumafai e mafaufau i ni taimi na **tatou** faia ai ni faamatalaga po o ni gaoioiga lē agalelei i se tasi. Pe e tatou te lē talisapaia le alolofa ma le agalelei o uso ma tuafāfine o ē na lē amana'ia a tatou mea sesē? (**Faitau le Faialauga 7:21, 22.**) E sili ona tatou lotofaafetai i le agalelei o Keriso lea ua tatou autasi ai o ni tagata tapua'i moni. (Kolo. 3:15) E tutusa le Atua o loo tatou alolofa uma i ai, tutusa le fe'au o loo tatou tala'ia, ma e tutusa faa-

fitauli o loo tatou fesaga'ia. Pe afai e tatou te agalelei ma fefaamagaloa'i ma le alofa, o le a tatou saosaolaumea ai i le autasi o Kerisiano ma tatou taula'i atu ai pea i le tau'i o le ola.

¹⁰ Ua faamanatu mai iā i tatou i faaa'oa'oga lapata'i o loo i le Tusi Paia, e mafai ona aveesea lo tatou tau'i ona o le lotoleaga. O se faaa'oa'oga, o le lotoleaga o Kaino na māfua ai ona ia fasiotia lona uso o Apelu. Na lotoleaga Koru, Tatano, ma Apiramo iā Mose ma latou fouvale ai iā te ia. Sa lotoleaga fo'i le tupu o Saulo i le taulau manuia o Tavita ma taumafai ai e fasiotia o ia. E lē-tioa la a faapea mai le Afioga a le Atua: "O le mea o iai le lotoleaga ma le faamisa, e iai fo'i le vevesi ma mea leaga uma."—Iako. 3:16.

¹¹ Pe a atia'e i o tatou loto le alofa ma le agalelei, o le a faigofie la ona tatou 'alofia le lotoleaga. Ua faapea mai le 1 Korinito 13:4: "E faapalepale ma e agalelei le alofa. E lē lotoleaga le alofa." Ina ia aua ne'i mauaa le lotoleaga i o tatou loto, e ao ona tatou taumafai ia vaai i mea e pei ona silasila i ai le Atua. E ao ona tatou manatu i o tatou uso ma tuafāfine o sui o le tino e tasi, o le faapotopotoga Kerisiano lea. O le faia faapea o le a fesoasoani e tatou te faalia ai le tigā alofa, ina ia ōgatusa ai ma le fautuaga lenei: "Afai e faamamaluina se itutino e tasi, e olioli ai fo'i itutino uma." (1 Kori. 12:16-18, 26) O lea la, nai lo o le lotoleaga, o le a tatou fiafia pe a maua e isi ni faamanuiaga. Se'i manatu i le faaa'oa'oga a Ionatana le atalii o le tupu o Saulo. E le'i lotoleaga Ionatana ina ua tofia Tavita e avea ma tupu, ae sa ia faalaeiau iā Tavita. (1 Samu. 23:16-18) Pe e mafai ona tatou agalelei ma alolofa e pei o Ionatana?

8, 9. (a) O ā uiga o le a fesoasoani iā i tatou ina ia maua ai le tau'i? (e) O le ā e fesoasoani iā i tatou ina ia faatumaui ai le filemu pe a faatigā mai se isi Kerisiano?

10, 11. (a) Aiseā e mata'utia ai le lotoleaga? (e) E faapefea ona tatou faamautinoa e lē aveesea lo tatou tau'i ona o le lotoleaga?

IA MAUA FAATASI O SE AIGA LE TAU

¹² O le faatatau o mataupu silisili o le Tusi Paia, e mafai ona maua ai le filemu ma le fiafia i se aiga ma fesoasoani iā i latou ina ia maua ai le tau. O le ā le fautuaga faale-Tusi Paia mo aiga na avatu e Paulo i Kerisiano i Kolose? Na faapea atu o ia: “O outou avā, ia gauā i i a outou tane, auā o le mea lea e tatau i le Alii. O outou tane, ia alofofa atu pea i a outou avā, ma aua le soona feita iā i latou. O outou le fanau, ia usiusita’i i o outou mātua i mea uma lava, auā o le mea lea e finagalo malie i ai le Alii. O outou tamā, aua le faanoono i a outou fanau, ina

12. O le ā le fautuaga faale-Tusi Paia o le a fesoasoani e tatou te maua faatasi ai o se aiga le tau?

ne’i lotovaivai i latou.” (Kolo. 3:18-21) E mautinoa e te ioe mai o le a maua e tane, avā, ma fanau aogā pe afai e faatatauina lenei fautuaga a Paulo.

¹³ Ae faapefea pe afai o oe o se avā ma e te manatu e lē lelei le auala e feutaga’i mai ai lau tane lē talitonu iā te oe? Po o le a faaleleia le tulaga o mea pe afai e te ita ma finau atu e faatatau i ona uiga? E tusa fo’i pe e fai e lau tane le mea o e mana’o i ai, ae po o le a ia talia ai le upu moni? Atonu e leai. Peita’i, pe afai e te faaaloalo i le tulaga ulu o lau tane, o le a e saosaolaumea i le mauaina o le filemu i lou aiga, o le a e faamamalu-

13. E faapefea i se tuafafine Kerisiano ona fesoasoani i lana tane lē talitonu ina ia talia le tapua’iga moni?

E faapefea ona ‘alofia le avea o faafitauli i le aiga ma pogai e aveesea ai lo tatou tau?

(Taga’i i le palakalafa e 13-15)



ina Ieova, ma atonu o le a talia ai e lau tane le tapua'iga moni. O le i'uga, o le a lua maua uma ai le tau. —**Faitau le 1 Peteru 3:1, 2.**

¹⁴ Ae faapefea pe afai o oe o se tane ma e te manatu e lē o faaaloalo mai iā te oe lau avā lē talitonu? Po o le a faaaloalo mai lau avā pe afai e te avaavau atu iā te ia ma fai i ai o oe o le pule? E mautinoa e leai! E finagalo le Atua ia faatino lou tulaga ulu i se auala alofa ina ia faaa'oa'o ai iā Iesu. (Efe. 5:23) O loo faatino e Iesu lona tulaga ulu i le faapotopotoga i se auala alofa ma onosa'i. (Luka 9:46-48) Pe afai e faaa'oa'o se tane iā Iesu, e ono mafai ona ia fesoasoani ai i lana avā ina ia talia le tapua'iga moni.

¹⁵ Ua faatonuina tane i le Kolose 3:19 e faapea: “Ia alolofa atu pea i a outou avā, ma aua le soona feita iā i latou.” O le tane alofa e āva o ia i lana avā e ala i le faalogologo atu i ona manatu, ma faamautinoa i ai e tāua iā te ia ona manatu. (1 Pete. 3:7) E ui e lē o taimi uma e mafai ai e le tane ona fai mea e talosaga mai ai le avā, ae o le faalogologo atu i lana avā o le a fesoasoani e na te faia ai ni filifiliga lelei. (Faata. 15:22) O se tane alofa e taumafai e gaioi i se auala o le a faaaloalo mai ai lana avā iā te ia, nai lo o le faamalosia o le avā e faaaloalo iā te ia. Pe a alofa se tane i lana avā ma le fanau, e lē taumateā o le a latou maua se aiga e auauna fiafia iā Ieova ma maua le tau i le ola.

TALAVOU—AUA NE'I AVEESEA E SE MEA LO OUTOU TAUI

¹⁶ Ae faapefea pe afai o oe o se talavou ma e te manatu e lē o malamalama ma ua faasāsā na'uā ou mātua Kerisiano iā te oe? O lou lē fiafia atonu e te masalosalo ai po o le

14. O le ā e tatau ona fai e se tane Kerisiano pe afai e lē faaaloalo mai iā te ia lana avā lē talitonu?

15. E faapefea ona faaalua atu e se tane Kerisiano lona alofa i lana avā?

16, 17. E faapefea iā te oe o se talavou ona 'alofia le lē fiafia i ou mātua?

auauna iā Ieova o le olaga sili lea. Peita'i, pe afai e avea lou lē fiafia ma pogai e te lafoa'ia ai le auauna iā Ieova, mulimuli ane o le a e iloa e leai nisi e sili ona alolofa moni iā te oe, nai lo o ou mātua e matata'u i le Atua ma lau faapotopotoga.

¹⁷ Pe afai e lē faasa'oina oe e ou mātua, po o le a e lē taumānatu la pe e alolofa moni ou mātua iā te oe? (Epe. 12:8) Atonu o le mea lenā e te lē o fiafia ai o le **auala** o loo a'oa'i ai oe e ou mātua. Ae nai lo o le faaseā i le auala o loo a'oa'i ai oe, ia taumafai e iloa atonu e iai se mǎfuaaga ua la faia ai faapena. O lea, ia to'afilemu pea ma taumafai malosi e 'alofia le soona inainā i faitioga a ou mātua. Ua faapea mai le Faataoto 17:27: “O lē ua pulea ana upu ua iā te ia le poto, a o le tagata ua iai le faautaga loloto ua to'afilemu lona loto.” Ia fai ma ou sini le avea ma sē e matua le mafaufau e mafai ona talia ma le filemu fautuaga, ma maua mai ai aogā e aunoa ma le soona popole i le auala o loo aumai ai fautuaga. (Faata. 1:8) Ia manatua, o se faamanuiaga le iai o ni mātua e talitonu ma alolofa moni iā Ieova. E mautinoa e la te manana'o e fesoasoani iā te oe ina ia maua le tau i le ola.

¹⁸ E lē mafaatusalia le matagofie o le tau i ua saunia mai mo i tatou, e tusa po o le ola e lē mafai ona oti i le lagi po o le ola e faavavau i le lalolagi. O se faamoemoe e mautinoa ona e faavae mai i le folafolaga a Lē na foafoaina mea uma. Ua ta'ua e le Atua e faatatau i le lalolagi Parataiso: “O le a tumu le lalolagi i le poto e uiga iā Ieova.” (Isa. 11:9) O le a a'oa'oina e le Atua i latou uma o le a ola i le lalolagi i lenā taimi. E mautinoa e tauia lo tatou tauivi ina ia maua lenā tau. O lea, ia taula'i atu pea o tatou mafaufau i mea ua folafola mai e Ieova, ma ia aua ne'i aveesea e se mea lo tatou tau!

18. Aiseā ua e maumaua'i ai e taula'i atu pea i le tau?



E FAAPEFEA ONA E FAAMASANI I LAU FAAPOTOPOTOGA FOU?

UA FAAPEA mai Allen.* “Na ou popole i le siitia mai iinei. Ou te le’i iloa po o le a maua ni a’u uō fou pe talileleia fo’i a’u.” O loo tau faamasani Allen i se faapopotoga fou lea e toetoe 900 maila (silia i le 1,400 km) mai i lona aiga.

Pe afai ua e siitia i se isi faapopotoga, atonu la o loo e lagona fo’i le popole. O le ā e mafai ona fesoasoani iā te oe a o feagai ma lenā suiga? O le ā e mafai ona e faia pe afai ua faigatā lenā suiga nai lo o le mea na e faatalitalia? I le isi itu, e mafai faapefea ona e fesoasoani i ē o loo feagai ma suiga ona e fou mai i le faapopotoga?

E FAAPEFEA ONA E FAAMASANI MA E TAULAU I SE FAAPOTOPOTOGA FOU?

Se’i mafaufau i le faata’ita’iga lenei: Pe a sua se laau ina ia toe totō i se isi mea, o le a faigatā ona ola. A o taumafai e sua ese se laau mai i le palapala, o le tele o ona aa o le a motusi ina ia faigofie ai ona ave i se isi mea. Ae o le taimi lava e toe totō ai le laau, e tatau ona vave ona toe tutupu ona aa fou. I se tulaga talitutusa, o le siitia atu i se isi faapopotoga, e te ono lagona ai le popole. I lau faapopotoga muamua, na pei na tutupu ni “aa” ina ua e atia’e ni faauōga māfana ma iai sau faasologa faaleagaga na e masani ai. Ae ua tatau nei ona e atia’e ni aa fou, o ni uō fou ma se faasologa faaleagaga ina ia e taulau ai i le si’omaga fou. O le ā o le a fesoasoani iā te oe? O le faatauta lea o mataupu silisili o le Tusi Paia. Se’i o tatou tilofa’ia nisi o na mataupu silisili.

O le tagata e faitau e lē aunoa i le Afioga a le Atua, “e pei lava o se laau ua totō i tafatafa o vaitafe, e fua mai ona fua i ona lava tau e lē mamae fo’i ona lau, ae e taulau manuia mea uma e na te faia.”—Sala. 1:1-3.

E mana’omia e se laau le vai i taimi uma ina ia faaauu ai ona ola lelei. E tatau fo’i ona fafagaina e lē aunoa se Kerisiano i le Afioga a le Atua, ina ia tumau ai ona malosī faaleagaga. O lea, ia faaauu ona faitau le Tusi Paia i aso ta’itasi ma auai e lē aunoa i sauniga a le faapopotoga. Ia tausisi i lau masaniga lelei o le faia o le tapua’iga a le aiga ma au oe lava su’esu’ega. Po o ā lava mea na e faia i le taimi muamua ina ia faamalosia ai la oulua faiā ma Ieova, e te mana’omia fo’i i le faapopotoga fou ua e auai ai.


“O lē e na te matuā faasūsū isi, o le a matuā faasūsūina o ia.”—Faata. 11:25.

O le a faamalosia oe ma vave ona e masani pe a faia sou sao atoatoa i le faiva. Ua faapea mai Kevin o se toeaina Kerisiano: “O le mea na fesoasoani tele iā i ma’ua ma la’u avā ina ua ma faato’ā taunuu i le ma faapopotoga fou, o le fai lea o la ma paeonia lago-lago. Na vave ai ona ma masani i uso, paeonia, ma le oganuu.” Ua faapea mai Roger lea na siitia atu i se vaipanoa e silia i le 1,000 maila (silia i le 1,600 km) mai le mea sa nofo ai: “O le auala sili e faamasani ai i se faapopotoga fou, o le auai lea i le faiva i le fanua i le tele e mafai ai. E lē gata i lea, ia faailoa atu i toeaina o loo e avanoa e fesoasoani i so o se mea, atonu e ala i le faamamāina o le Maota mo Sauniga, taufo i se vaega i le sauniga, pe ofo atu e momoli nisi i le sauniga. Pe a vaaia e uso ma tuafāfine se isi e fou atu o loo faaalua le agaga faataulaga, e latou te talia lelei o ia.”

“Ia faalautele atu o outou loto.”—2 Kori. 6:13.

Ia faalautele atu lou alofa faaleuso. Ina ua siitia atu Melissa ma lona aiga i se faapopotoga fou, na latou ua’i atu i le mauaina o ni uō fou. Ua ia faapea mai: “Na matou faifaimea faatasi ma isi i le Maota mo Sauniga a o le’i amata pe mē’a fo’i sauniga. O le faia faapea

* Ua suia nisi i goa.



Pe a sua se laau ina ia toe totō i se isi mea, o le a faigatā ona ola. Ae o le taimi lava e toe totō ai, e toe tutupu ona aa fou

na maua ai le taimi e talanoa ai nai lo o le tau ina faamālō atu.” Na fesoasoani fo’i lea i le aiga e vave ai ona latou iloa igoa o isi i le faapotopotoga. Na faalatele atu fo’i lo latou alofa faaleuso e ala i le talimālō i isi, ma na faamalosi ai a latou faauōga. Na faapea atili mai Melissa: “Na faamau i lalo numera o a matou telefoni ina ia mafai ai ona matou fesoata’i, ma faaafia i matou i mea faaleagaga ma isi fuafuaga.”

Pe afai e faafaigatā ona e talanoa atu i ni tagata fou, e mafai ona e amata i ni auala faigofie. O se faata’ita’iga, ia ‘ata’ata e tusa lava pe e te lē o fia ‘ata. O le mata’ata’ata o le a fialia mai ai isi iā te oe. O le mea moni, “o le malamalama o mata [po o le mata’ata’ata] e faafiafia ai le loto.” (Faata. 15:30) Ua faapea mai Rachel o lē na siitia mamao ese mai i le mea na ola a’e ai: “O a’u lava ia ou te matamuli. O nisi taimi ou te faamalosi e talanoa atu i uso ma tuafāfine i la’u faapotopotoga fou, e tusa lava po ou te lē fia talanoa. Ou te sa’ilia se tasi o loo saofa’i i le Maota mo Sauniga e lē o talanoa i se isi. Atonu o lenā tagata e matamuli e pei fo’i o a’u.” Aiseā e lē faatū ai se sini o le talanoa ma se tagata fou a o le’i amata pe mae’a fo’i sauniga ta’itasi?

I le isi itu, atonu na e fialia e feiloa’i i tagata fou i le amataga. Peita’i, a o faagasolo taimi e mafai ona mou atu lenā fialia. Pe afai o lea, e mana’omia ona e finafinau ina ia **faaauau** ona maua ni uō fou.

E MANA’OMIA SE TAIMI E TE FAAMASANI AI

O nisi laau e umi se taimi e toe sosolo ai aa i le palapala fou nai lo o isi laau. I se tulaga talitutusa, e lē tutusa uma le umi e faamasani ai tagata i se faapotopotoga fou. Pe afai ua umi se taimi talu ona e siitia i se isi faapotopotoga ae o loo faafaigatā pea ona e faamasani i ai, e mafai ona fesoasoani mataupu silisili nei iā te oe:

“Aua ne’i o tatou fiu e faia le mea lelei, auā e iai le taimi e tatou te selesele mai ai, pe a tatou lē faavaivai.”—Kala. 6:9.

Ia **lava** le taimi e te faamasani ai nai lo o le umi na e faatalitalia. O se faata’ita’iga, o le to’atele o misionare na toleni i Kiliata e nonofo mo ni tausaga i atunuu ese ua tofia i ai, a o le’i toe asiasi atu i o latou atunuu. O le faia faapea ua fesoasoani iā i latou ina ia māfana ai i uso i na atunuu, ma faamasani ai i se aganuu fou.

E malamalama lelei Alejandro o sē na siitia i isi vaipanoa i le tele o taimi, e umi se taimi e taumafai ai e faamasani i se si’omaga fou. Ua ia faapea mai: “O le taimi mulimuli na ma siitia ai, na faapea mai la’u avā, ‘O a’u uō uma o loo i le faapotopotoga lea na ta iai!’” Na faamanatu atu e Alejandro i lana avā, o lana faamatalaga fo’i lenā na fai i le lua tausaga muamua atu na la siitia ai. Ae a o faagasolo lenā lua tausaga, na faaalii e le tuafafine le naunau i isi ma na avea ai tagata ese ma ana uō mamae.

“Aua le faapea ane: ‘Aiseā ua sili ai ona lelei aso ua mavae nai lo o nei aso?’ auā e lē o le atamai ua e fesili ai i lenei mea.”—Fai. 7:10.

Ia ‘alofia le faatusatusa o lau faapotopotoga fou i le faapotopotoga na e iai muamua. O se faata’ita’iga, o uso i lau faapotopotoga fou atonu e tau lē talanoa pe e lē fefefe fo’i e faailoa mai o latou manatu, nai lo o uso i le faapotopotoga na e iai muamua. Ia e ua’i atu i o latou uiga lelei e pei fo’i ona e mana’o e latou te ua’i mai i ou uiga lelei. O nisi e fou i isi faapotopotoga ua faate’ia i nei uiga ma ua mana’omia ai ona latou fesili ifo, ‘Po ou te alofa moni lava “i le ‘auuso **atoa**?”’—1 Pete. 2:17.

O ā Auala e Fesoasoani Atu ai Toeaina?

E manana’o toeaina ia e olioli i lau faapotopotoga fou, ma ua latou nofosauni e fesoasoani atu.

- E tatau i le Komiti o le Aunaga a le Faapotopotoga ona vave tofia oe i se vaega mo le tala’iga.
- E mautinoa o le a fesili atu le failautusi i se auala e mafai

ona faafesoota’i ai lau faapotopotoga muamua, ina ia maua mai lau pepa o *Faamaumauga mo le Tagata Tala’i a le Faapotopotoga*.

- E tatau i le ovasia o le vaega fou mo le tala’iga lea ua tofia i ai oe, ona taumafai e te lua galulue faatasi i le tala’iga pe a e tau-nuu atu. E lelei fo’i pe a ia faia

se asiasiga faaleoleo mamoe e faamasani ai i lou aiga.

- E tatau ona talosaga atu toeaina mo lau numera o le telefoni ina ia mafai ai ona faafesoota’i oe pe a tula’i mai ni mala faale-natura.
- E lelei fo’i pe a faamautinoa e toeaina ua faafou lau pepa o le toto mo faatonuga faafoma’i.

“Ia talosaga atu pea, ona foa’iina mai lea iā te outou.”—Luka 11:9.

Ia faaauau ona tatalo mo le fesoasoani. Ua faapea mai David o se toeaina: “Aua e te taumafai e onosaia na o oe lenā tulaga. O le tele o mea e faato’ā mafai ona tatou faia e ala i le fesoasoani a Ieova. Ia tatalo e faatatau i lenā faafitauli.” E ioe fo’i Rachel lea na ta’ua i le amataga i lenei manatu. Ua ia faapea mai: “Pe a ma lagona ma la’u tane e pei i ma’ua o ni tagata ese i le faapotopotoga, e ma te tatalo iā Ieova, ‘Faamolemole ia e faailoa mai po o iai se mea o loo ma faia, ua faafaigatā ai i isi ona māfana mai iā i ma’ua.’ Pe a uma, ona ma taumafai lea e faaalu le tele o lo ma taimi faatasi ma uso ma tuafāfine.”

Mātua e, pe afai o loo faigatā i lau fanau ona faamasani i le faapotopotoga fou, ia faaalu se taimi e tatalo faatasi ai ma i latou e faatatau i lenā faafitauli. Ia fesoasoani iā i latou ina ia maua ni uō fou e ala i le fuafua o ni faatasitaisiga e faalaeiaiuina ai.

IA TALIA FIAFIA I LATOU E FOU MAI I LE FAAPOTOPOTOGA

O le ā e mafai ona e faia e fesoasoani ai i ē ua siitia mai i lau faapotopotoga? Ia taumafai e ave a oe ma uō moni mai lava i le amataga. Ina ia e faia faapea, ia mafaufau po o ā mea e te fiafia i ai pe afai o oe o le tagata fou, ona faitino lea o na mea. (Mata. 7:12) Pe

e mafai ona auai mai ē fou i le tapua’iga a le tou aiga, pe matamata le polokalame o le masina i le TV i le Initaneti a Molimau a Ieova? Pe e mafai ona e valaaulia i latou e tou te galulue faatasi i le faiva? Pe a e valaaulia i latou mo se ‘aiga māmā, o le a latou manatua pea lou agaga talimālō. O ā nisi mea e mafai ona e fesoasoani ai i ē e fou mai i lau faapotopotoga?

Ua faapea mai Carlos, “Ina ua matou faato’ā tau-nuu i le faapotopotoga fou, na aumai e se tuafāfine se lisi o faleoloa e taugofie. Na matuā fesoasoani lenā iā i matou.” O i latou fo’i ua siitia mai ae e lē masani i le tau a lo tatou atunuu, e latou te talisapaia pe a faailoa i ai le auala e fai ai ofu mo le tau vevela, tau mālūlū, po le tau o timuga. E mafai fo’i ona e fesoasoani iā i latou ina ia taulau i le faiva, e ala i le faamatala i ai o le talafaasolopito po o talitunuga faalotu o le atunuu.

O AOGĀ O LE FAAMASANI I LE FAAPOTOPOTOGA FOU

Ua silia nei i le tausaga talu ona iai Allen lea na ta’ua i le amataga i lana faapotopotoga fou. Ua ia faapea mai: “I le taimi muamua na faafaigatā ona ou faamasani i uso ma tuafāfine. Ae i le taimi lenei, ua pei i latou o so’u aiga ma ua ou maua le fiafia.” Ua iloa e Allen, e le’i faapea ua leai ni ana uō ina ua siitia. Nai lo o lea, ua ia maua ni uō fou lea e lē taumatea o le a avea pea ma ana uō i lona olaga atoa.



E mafai ona maua fua kopi o lenei mekasini ma isi lomiga



E mafai fo’i ona e faitau i le *Faaliliuga a le Lalolagi Fou* i le Initaneti

Faaaogā le code pe taga’i i le www.jw.org/sm



wf7:11-SM
170711